

मर्कूसए ओसरो चाव था

आव पोस्तोको तोबो मर्कूस यादोज्यावए ओसरो ज़। नोलाई यूहन्ना ब यादोज्याव (ओसाचीर १२:१२; १५:३६-४१)। आलाव पाँ मत्ती सोनो लूकानी निसरो पाँकिन जाँ तूईज़ा लिज़्या। आल येसुए ओरासथैव पाँ कोसै मारै:र, जाँकोसै ओदोव येनर वाज़ रै:ज़्या। कुधु पाला येसुए ओक्याँलाई 'डा मिँ मिन्सिद हुव' है उलिज़्याव (मर्कूस २:१०; ८:३१)। नो 'मिँ मिन्सिउए' ओअर्थ येसु साचो मिँ ब उलिज़्याव, परमेस्वरए साचो ओज़ा ब उलिज़्याव। है जैद मानुवाताव मिँरालाई बाँचैद परमेस्वरए ल्योदा जैन्याए जूनी उजिउ झा:द यासेवा ओदोहुव ज़ रै:ज़्या (१०:४५)।

रील सछैँज़्याव यूहन्ना

(मत्ती ३:१-१२; लूका ३:१-१८; यूहन्ना १:१९-२८)

1 आलाव सर्सिउ परमेस्वरए ओज़ा येसु ख्रीसए चाव ओथा ज़।

2 यसैया अगमबक्ताए धर्मसास्त्रल किताव ओसरो हिताव ज़ ताके। होए ओसरो आव ज़,

“डाकत्वाल्यालाई नड़ा नड़ा परींद डाईज़्या।

नजूनी नोए नयेम तयार जैदीरिज़्याव।

3 नोए ओर्गा बनल अइ लिद उकिज़्याव थास्त्रिज़्या,

‘हुरिज़्याव प्रभुए ओयेम बनैद गाँत्या गुंतीलाई सदाँचिके।’”

4 हिताव ज़ रील सछैँज़्याव तोबो यूहन्नाए बनल अइ लिद यासथैहुक्यो, “जेपापलाई रासद जेयुँ परमेस्वरए ल्योदा फकैद रील सछैँसिचिके। हो ताकिन ची जेपापर क्याल्सिद परमेस्वरस खैवर तान्या जेले।” 5 नोए ओल्योक यहूदिया खन्दलावर सोनो यरूसलेम सहरलावर ओपो:स ज़ ओपाँ थैना याहुज़्याव। नोराए

सु सु यादोव यापाप यूहन्नालाई है यादोक ते यूहन्नाए यर्दन भैल यासछैक्यो।

6 यूहन्नाए ऊँतए ओसनए क्वा ओक्वाइसिज्याव, ओवाँ:त स्यालोए वाँ:फो ओपो:सिज्याव। नोए स०ल०र कोस्योर ओराकैज्याव, जेराए राप उज्युज्याव। 7 नोए अइ लिद यासथैक्यो, “डा डाछीनी डाकिन ओसक्ती ल्यो तोबो हुरिज्या। डा होए ओपोलाए ओचें घोम लिद पलान्या स्यासो ब डामाले। 8 डा जेलाई रील डासछैचिज्या, होए परमेस्वरए छैव उपरूसनी सछैचिरिज्याव।”

येसु रील ओसछैसिउ

(मत्ती ३:१३-१७; लूका ३:२१-२२; यूहन्ना १:२९-३४)

9 नो बेलाक येसु मनी गालील खन्दलाव नासरत सहरनी यूहन्नाए ल्योक हुके। नो ब यूहन्नानी यर्दन भैल सछैसिके। 10 रीनी उपुलुसो प्राइँना ज़ नम फैसिद परमेस्वरए उपरूस कुइतम मिताव भुहुद ओक्याँत उचुसिज्याव रँ:क्यो। 11 हा:त ज़ नमतिन तोबो गा अइ लिद थास्के, “नँ डायुँलाव डाज़ा ज़। नँलाई रँ:द डायुँ होलाँ ताज़्या।”

सैतानए येसुलाई ओजाँचिउ

(मत्ती ४:१-११; लूका ४:१-१३)

12 येसु ननी पुलुसुद ओबाव प्राइँना ज़ परमेस्वरए छैव उपरूसए तोबो साइँसुइँव पोड लाँक्यो। 13 नल चालीस दिन पै बनलाव स्यारास उलिज्याक सैतानए येसुलाई जाँचिउ ज़ नैक्यो। ना:त ज़ स्वर्गताव परमेस्वरए ओचाकर्यार येसुए ल्योक हुद समारिकेर।

येसु चाव था सथैन्यात उथूसिउ

(मत्ती ४:१२-१७; लूका ४:१४-१५)

14 छीनी तछा रील सछैज्याव यूहन्ना क्यो:सिके। नोलाई याक्यो:व छचामकिन येसु गालील खन्दल हुद परमेस्वरए चाव

ओथा अइ लिद यासथैक्यो, ¹⁵ “बेला योके, परमेस्वरए ओराज्या सो हरिके। परमेस्वरए ल्योदा जेरुँर फर्केद चाव थात जेरुँ सुहुपचिके।”

येसुए चार जनालाई उसिसर ओराजैव

(मत्ती ४:१८-२२; लूका ५:१-११; यूहन्ना १:३५-४२)

¹⁶तछा येसु गालील दह छयो छयो ओबाज्याक सिमोन सोनो ओभाइ अन्द्रियासनी दहल जाल निरै:सिज्याव निरै:क्यो। नोनी डाँ:र क्यो:ज्यावनी निल्यो। ¹⁷ येसुए नोनिलाई, “डास हुचिन्के, जिनलाई डाँ:र जिन्राखिमज्याव मिताव मिँर खिमन्या डाजैचिन्रिज्या,” ¹⁸ है उनिदोव प्राईना ज़ नोनी निजालर ख्यानैद ओलस ज़ बाकिनी। ¹⁹ जाँ होकसै याबावत फरी जब्दियाए ओज्जानी ओदाज्यु याकूब सोनो ओभाइ यूहन्नानी दोङ्गात चुसिद जालर निरातालिज्याव रँ:द, ²⁰ बेहार ज़ नोनिलाई ब निखुल्क्यो। नोनी निबाबु जब्दियालाई ओबाहोर्यारास दोङ्गात ख्यानैद येसुस बाकिनी।

येसुए माचाव पुरूसलाई ओपलेव

(लूका ४:३१-३७)

²¹नकिन येसु चार जना ओराखुलोरास कफर्नहुम सहरल बाकेर। ओल येसुए नासिन्या छ्याम ओतावत नलाव धर्मसास्रत्र झिमल बाद परमेस्वरए ओपाँ यासथैक्यो। ²² नलावर येसुए ओपाँ थैद अचम्ब ताकेर, काराव ल्यो ताकिन होए सास्रतीराए यारापैज्याव मिताव माताद बनै हकस ओरापैज्याव।

²³नो बेलाक धर्मसास्रत्र झिमल माचाव पुरूसए क्यो:द ओनैज्याव तोबो मिँ ब उलिज्याव। नो बनै चिर चिर किद, ²⁴ “अ नासरतलाव येसु, गेस नखै काता उलिज्याव? गेलाई खेमना नहुव रो? डा नँलाई डासरेस्निज्या, नँ परमेस्वरए छैँव उमीं ज़,” है ओदोक ते, ²⁵ येसुए नोलाई हपकैद, “इयाउँ तालिनी, आवए ओक्याँतिन

पुलुसुद बान्के,” है ओदोव प्राइँना ज़, ²⁶ नो माचाव पुरुसए नो मिँलाई कारापनी कुरूप जैद चिर चिर क्रिद पुलुसुद बाके। ²⁷ निताव रँ:द प्राइँ ज़ अचम्ब ताद या याल, “आव काता ओताव इताव? आवए ते सा:रो पाँर ना: हकस ची ओरापैज़्याव ओल्यो। माचाव पुरुसरालाई ओराहपूकैक मनी ओपाँर यादोज़्याव ची ओल्यो,” है लिकेर। ²⁸ है जैद ‘येसुए निताव येनर दोक्यो दी’ लिन्या गालील खन्द भरिल प्राइँदा ज़ थासनाके।

सिमोनए उमुइँज्युलाई येसुए ओसगराँव

(मत्ती ८:१४-१५; लूका ४:३८-३९)

²⁹ धर्मसास्त्र झिमनी यापुलुसो प्राइँना ज़ येसु चार जना उसिसरास सिमोन सोनो अन्द्रियासनी निझिमक बाकेर। ³⁰ नक सिमोनए उमुइँज्यु ओजोरो हुद घ्याँसिद उलिज्याव। उझिमक याबाव प्राइँना ज़ ‘ओजोरो हुज्या’ लिद येसुलाई है दोकेर। ³¹ येसु नो ओजोरो हुज्यावए ल्योक बाद उकुइनी क्यो:द ओसोचोइव प्राइँना ज़ ओजोरोए रास्क्यो। हा:त ज़ नोए येसु सोनो उसिसरालाई ज़्यावर जैद याएक्यो।

येसुए कुधुलाई ओरासगराँव

(मत्ती ८:१६-१७; लूका ४:४०-४१)

³² रिमदा रिमदा नम उनुपोत नलाव मिँराए याजोरो हुवर सोनो माचाव पुरुसराए क्यो:द यारानैज्यावरालाई येसुए ओल्योक याररैकेर। ³³ सहरलाव मिँ भरी ग्रामक छुइसिद यालिज्याव। ³⁴ येसुए कुधु बेथाए क्यो:द ओरानैज्यावरालाई ब यासगराँक्यो, याक्याँत माचाव पुरुस ल्योरालाई ब याक्याँतिन माचाव पुरुसर पलेद्याद यासगराँक्यो। नो पुरुसराए येसुलाई यासरेसज्यावए येसुए पाँव ज़ ओमाराएज्याव।

येसुए गालीलल परमेस्वरए ओपाँ ओरासथैव

(लूका ४:४२-४४)

35 छकालून्या ओमासँद ज़ येसु सोद ज़िमनी पुलुसद साइँसुइँव पोक बाद परमेस्वरलाई ओपोखारिज़्याव। 36 सिमोन सोनो ओलस लिज़्यावराए ‘काना ओबाव’ लिद खिमनाकेर। 37 यादैक, “नँलाई प्राइँए ज़ खिमनिज़्यार,” है यादोक ते, 38 येसुए, “परमेस्वरए ओपाँ आजीलावरलाई वाज़ डारासथैहुव माःक, हुजीदाडावराए जूनी पाला ज़। हुचिके, नदा ब गेरासथैना,” है यादोक्यो। 39 है जैद ननी बाद गालील खन्द भरिलाव यहूदीराए धर्मसास्त्र ज़िम ज़िमक बाद परमेस्वरए ओपाँ प्राइँलाई ज़ यासथैक्यो। याक्याँत माचाव पुरुस ल्योरालाई ब माचाव पुरुसर पलेद याएक्यो।

येसुए कुरीलाई ओसगराँव

(मती ८:१-४; लूका ५:१२-१६)

40 हो बेलाक ज़ तोबो कुरी येसुए ल्योक हुद उखँत फुलुपसिद, “अ प्रभु, डाल्योदा नयुँ ओताकिन डालाई सगराँन्या नले,” है ओदोक ते, 41 येसुए उयुँ नाद नोलाई उकुइए छापद, “नल्योदा डायुँ लिज़्या ज़, गरॉनिके,” 42 है ओदोव प्राइँना ज़, नो ओक्याँताव कुरीए रासद सोजोकाव ज़ ताके। 43 येसुए नो गरॉवलाई अइ लिद अरैद बेहार ज़ परींक्यो, 44 “आव नक्याँताव डादोव येन सुलाई ज़ है तारादोयो। बुरू नगराँव साचो ज़ ओल्यो लिन्या थरैव परीन्याए जूनी पुजारीए ल्योक सतैसिनाद मोसाए ओकानुनलाव मिताव चरैःन्यार चरैःनाके।” 45 खाली नो गरॉवए ज़न ननी पुलुसद ओक्याँत ताव भरी प्राइँदा ज़ फीजैक्यो। है जैद येसुए उमिन बनै ओथासोए नजीलाव सहर नाखार जीदा बाव मादैद साइँसुइँवक लिनाके। हितावत ब मिँर प्राइँनी ज़ ओल्योक दैसिहुकेर।

2

येसुए उखँ उकुइ सिउलाई ओसगराँव

(मती ९:१-८; लूका ५:१७-२६)

1 तच्छा छींनी येसु कफर्नहुम सहरल उहुवत, 'येसु उलिज़्याव झिमक हुके दी' लिन्या थास्के। 2 ओल्योक मिँर बनै सुइँ: मासुइँ: छुइसिहुद झिम भरी, मैरा भरी ब मासुइँ:केर। येसुए नोरालाई परमेस्वरए ओपाँ ओरासथैज़्याव। 3 नो बेलाक ज़ तोबो उखँ उकुइ सिउलाई चार जनाए घुर्द यारैज़्याव। 4 खाली येसुए ल्योक मिँर बनै माहोल्या यातावए ओल्योक बान्या येम मादैद नोर थालात बाद झिम कप्सिउ फल्यार जाँवा हाइद सघ्वाँ:द नो उखँ उकुइ सिउलाई ओझेलोङ्गारास येसुए ओङ्गाक झरैदिकेर। 5 येसुए नोराए यायुँ उहुबो रँ:द नो उखँ उकुइ सिउलाई, "अ कान्छा, नपाप क्याल्सिके," है दोक्यो।

6 नो है ओदोव नक लिज़्याव सास्त्रीराए थैद यायुँल यायुँल, 7 "आव मिँ काराव ब्याँ इताव ओपाँज़्याव, परमेस्वरए उमिन ओबलेज़्याव। मिँए ओपाप क्याल्न्या परमेस्वरकिन सु ची उलिज़्यावदा?" है लिकेर। 8 हा:त ज़ येसुए नोराए यायुँलाव पाँ सैद, "जे काराव जेयुँल नै जेलिज़्याव? 9 नो घ्याँस्यालाई, 'नपाप क्याल्सिके' है दान्या सै 'सोद नझेलोङ्गार घुर्द बान्के' है दान्या काताकाव सजालो उलिज़्याव? 10 अब डा मिँ मिन्सिद हुवए आव मानुवात पाप क्याल्न्या डाकुइत उलिज़्याव सै ओमालिज़्याव, चिऊचिके," है दाद नो उखँ उकुइ सिउलाई, 11 "डा नँलाई है डादींज़्या, नँ सोद नझेलोङ्गार घुर्द नझिमदा बान्के," है ओदोक ते, 12 नो उखँ उकुइ सिउ थर च्याँ:सिद ओझेलोङ्गार घुर्द याङ्गाकिन पुलुसुद बाके। निताव रँ:द प्राइँ ज़ अचम्ब ताद, "इताव ते खर्क ज़ गेमार्:ए," लिद परमेस्वरए उमिन सघ्यो:दिकेर।

येसुए लेबीलाई उसिस ओजैव

(मत्ती ९:९-१३; लूका ५:२७-३२)

13 नकिन येसु फरी दह छचोक बाके। ओल्योक मिँर बनै माहोल्या

याहुज्याव। नोरालाई परमेस्वरए ओपाँ यासथैक्यो। ¹⁴ ननी पुलुसूद ओबाज्याक तोबो अल्फयसए ओजा लेबीलाई सिर्मा स्योःन्या अद्दाक चुसिद उलिज्याव रँःद नोलाई, “डास हुन्के,” है ओदोव प्राइंना ज़ नो च्याँःसिद येसुए उछींत बाके।

¹⁵ नकिन जाँवाक येसु उसिसरास लेबीए उझिमक बाद ज्ञयान्याए जूनी चुसिकेर। नो बेलाक यास सिप ज्युज्यावर सिर्मा स्योःज्यावर सोनो पापी है यारादोज्यावर बनै कुधु ज़ यालिज्याव। निताव मिँर येसुस बारिज्यावर कुधु ज़ यालिज्याव। ¹⁶ नितावरास येसुए सिप उज्युज्याव फरिसीरासकाव सास्त्रीराए रँःद येसुए उसिसरालाई, “जेगुर्बा काराव निताव सिर्मा स्योःज्यावर सोनो पापीरास सिप उज्युज्याव?” है यारादोज्याव ¹⁷ येसुए थैद, “याजोरो माहुज्यावरालाई सगराँन्या मिँ माचाहिए, याजोरो हुज्यावरालाई वाज़ चाहिज्या। हिताव ज़ डा मनी ‘गे धर्मी’ है लिज्यावराए जूनी डाहुव माःक, ‘गे पापीर ज़’ है लिज्यावराए जूनी डाहुव ची।”

उपासिन्या

(मत्ती ९:१४-१७; लूका ५:३३-३९)

¹⁸ ख्वा मिँर रील सछैँज्याव यूहननाए उसिसर सोनो फरिसीरासकावर याउपासिज्याव रँःद येसुए ल्योक हुद, “यूहननाए उसिसर सोनो फरिसीर ते उपासिज्यार, नँ नसिसर काराव यामाउपासिज्याव?” है यादोक ते, ¹⁹ येसुए नोरालाई, “जन्तीर ब्याहोल्यास यालेवा पै याउपासिज्याव रो? ब्याहोल्या यास ओलेवा पै माउपासिर। ²⁰ खाली जो छचामकिन ब्याहोल्यालाई छुतैर, हो छचामकिन वाज़ उपासिन्या लेर,” है दाद, ²¹ फरी, “सुए ज़ ओरे छिबो क्वालालाई साःरो क्वाए मातालिउ। ओतालिकिन नो साःरोए पुराँदोलाई ओलयोदा सेल्द इन ज़ चीज्याव। ²² सोनो, साःरो दाखमद्य पुराँदो प्रिर्गुलल सुए ज़ माझाःर। म्नी उस०ए प्रिर्गुललाई सुफुद दाखमद्य ब भोन्या

ले, प्रिर्गुल ब खेर ज़ बान्या ले। है जैद सा:रो दाखमद्य सा:रो प्रिर्गुलल वाज़ झा:र।”

येसु नासिन्या छचामकिन घेप्पा

(मत्ती १२:१-८; लूका ६:१-५)

23हो बेलाक तछा नासिन्या छचाम येसु उसिसरास एँ: खालाव घ्याँ याबाज़्याक उसिसराए बाला फ्याद याकैज़्याव। 24 फरिसीराए येसुलाई, “चिऊके, नसिसराए नासिन्या छचाम मादान्या येन काराव यादोऽयाव?” है यादोक ते, 25 येसुए, “धर्मसास्त्रलाव सर्सिउ दाऊद राजा ओनैरास याकरेकाव यादोव येन जेमापरिए रो? 26 दाऊद प्रधान पुजारी अबियाथारए ओपालाक ध्यान झिमल पसिद परमेस्वरलाई चरै:सिउ भरेस हाइद ओल मनी ज्युक्यो, ओनैरालाई मनी याएक्यो। नो भरेस पुजारीराए वाज़ ज्ञान्या ओताज्याव। 27 जे आव ब सैच्यो, मिँर नासिन्या छचामए जूनी जैसिउ मा:क, नासिन्या छचाम मिँराए जूनी ज़ जैसिउ ची। 28 है जैद डा मिँ मिन्सिद हुव नासिन्या छचामकिन ब घेप्पा ज़ डालिज्या,” है यादोक्यो।

3

येसुए उकुइ थँवलाई ओसगराँव

(मत्ती १२:९-१४; लूका ६:६-११)

1फरी तछा येसु धर्मसास्त्र झिमल बाके। नल उकुइ थँव मिँ तोबो उलिज्याव। 2 नल लिज्यावराए येसुए ओपाहा झा:द्यान्याए जूनी नासिन्या छचाम नो उकुइ थँवलाई मासगराँज्याव ब्याँ लिद चिऊद यानैज्याव। 3 ना:त ज़ येसुए नो उकुइ थँवलाई, “आक हुद च्याँ:सिन्के,” है दाद, 4 नोरालाई, “नासिन्या छचामकाव येन चाव जैन्या सै माचाव जैन्या? मिँलाई बाँचैन्या सै बलेन्या? कानुनए कै उलिज्याव?” है ओरादोक ते, सुए ज़ घाइ मालिकेर। 5 येसुए, काता

नाः यायुं खावर यालिज्याव लिद उयुं माचाव दाद उरिसए प्राईलाई तछ्योनी चिऊद नो उकुइ थँवलाई, “नकुइ तङ्गैके,” है ओदोक ते, उकुइ ओतङ्गैव प्राईना सोजोकाव ज़ ताके। 6 नो फरिसीराए निताव रँःद लाँःदा पुलुस्द, ‘आवलाई कै जैद सैःन्या ओताव?’ लिद बेहार ज़ हेरोद राजासकावरास गुमुस्ता दोनाकेर।

येसुए ल्योक हुज्याव माहोल्यार

येसु उसिसरास ननी हाइसिद गालील दह जीदा बाकेर। नल कुधु मिँर गालील सोनो यहूदिया खन्दनी उछींत याहुज्याव। 8 येसुए ओय्नेनर थैद ख्वार यरूसलेम सहरनी, ख्वार इदुमिआ खन्दनी, ख्वार यर्दन भै होफतिन, ख्वार तुरोस सोनो सीदोन जीनी ब याहुज्याव। 9 है जैद मिँर बनै काला मुलु ताद ओललाई बनै छिला छिला याजैवए उसिसरालाई दोङ्गा तोबो रैव यापरीक्यो। 10 मिँर बनै कुधु ओरासगराँवए याजोरो हुज्याव भरिए येसुलाई छाप्न्याए जूनी बनै याछुइसिहुज्याव। 11 जोक ब माचाव पुरूसराए येसुलाई यारँःव प्राईना होक ज़ ओङ्गाक फुलुप्सिद, “नँ परमेस्वरए ओज़ा ज़,” है लिद याकिज्याव। 12 खाली येसुए नोरालाई, “डा परमेस्वरए ओज़ा ज़ लिन्या सुलाई ज़ है तारादोच्यो,” है ओरादोज्याव।

येसुए बाह जना ओसाचीर

(मत्ती १०:१-४; लूका ६:१२-१६)

13नकिन येसु तोबो दाँदात पुलुस्द उयुंलाव मिताव मिँ भरिलाई ओराखुल्क नोर ओल्योक हुकेर। 14 नो भरिरानी बाह जना ओलस लिन्या ओसाचीर जैद नोरालाई चाव था सथैन्या, 15 सोनो माचाव पुरूसर पलेन्या हक ब याएक्यो। 16 नो बाह जनाराए यामिनर आवर ज़ — सिमोन (छीनी होए उमिन पत्रुस जैदिक्यो), 17 जब्दियाए ओज़ानी याकूब सोनो यूहननानी (छीनी नोनी निपाँःच्या ‘बोअनर्गेस’ नैद निएक्यो। नोए ओअर्थ ‘गर्जिज्यावनी’।) 18 नकिन अन्द्रियास, फिलिप, बारथोलोमाइ, मत्ती, थोमा, अल्फयसए ओज़ा याकूब,

थेदियस, देसभक्ता सिमोन, ¹⁹ सोनो छीनी येसुलाई धोका याजूयाव यहूदा इस्करियोत।

येसुलाई सैताननिकाव याजैव

(मत्ती १२:२२-३२; लूका ११:१४-२३; १२:१०)

²⁰येसु फरी उझिमक उहुक मिँर बनै काला मुलु याहुजूयावए उसिसरास जूयावर ब जूयुव मादैकेर। ²¹ ख्वाराए येसुलाई 'दासानी बिसा ताजूया' है ब यादोजूयाव। ओक्याँदाडावराए फरी निताव पाँर थैद येसुलाई चिहुकेर। ²² यरूसलेमनी हुव सास्त्रीराए मनी, "आवए ओक्याँत ते माचाव पुरूसराए याघेप्पा बालजिबुल चरिद ले। होए उमिननी ज़ माचाव पुरूसरालाई ओरापलेजूयाव ची," है लिकेर।

²³येसुए नोरालाई ओल्योदा खुल्द अइ लिद घर्ती झाःद याएक्यो, "सैतानए ओल सैतानलाई कै जैद ओपलेजूयाव? ²⁴ तोबो राज्यालाव मिँर या या यामाखैकिन नो राज्या माथंरिए। ²⁵ हो मिताव ज़ तोबो झिमलावर या या यामाखैकिन चितराँ पुतराँ तान्या लेर। ²⁶ है जैद सैतानए ओराज्यालावर ब या या माखैद तँदा तँदा याजैसिकिन नोर मनी माथंरिद यामिन ज़ मान्या ले। ²⁷ फरी तोबो ओर्सा ल्यो मिँलाई ड़ादा यामाकिवा पै उझिम पाःद ओजा-यार हाइद मालाँधुर।

²⁸"डा जेलाई साचो है डादाचिजूया, मिँराए जो पाप यादोदी ब, परमेस्वरए उमिन याबलेदी ब नोराए यापाप क्यालो दैसिए। ²⁹ खाली जोए परमेस्वरए छैँव उपुरूसए उमिन बलेदिजूयाव, होए ओपाप क्यालो मादैसिए। नितावए ओपाप खर्क ज़ माखेमे," है लिद यासथैक्यो। ³⁰ नो सास्त्रीराए 'येसुए ओक्याँत माचाव पुरूस चरिद ले' है यादोजूयावए येसुए आव पाँ ओरासथैव।

येसुए ओआमार ओभाइर

(मत्ती १२:४६-५०; लूका ८:१९-२१)

31 हा:त ज़ येसुए ओआमा स़ोनो ओभाइर हुद लाँक च्याँ:सिद येसुलाई क़िउ यारापरीकेर। 32 झिमल येसुए ओलापक मिँर माहोल्या चुसिद यालिज़्याव। है जैद नो क़िउ यारापरींवरए, “लाँक नआमा स़ोनो नभाइर नँस दैसिना हुद लेर,” है यादोक ते, 33 येसुए, “डाआमार डाभाइर कितावर?” है लिद, 34 ओलापक चुसिद लिज़्यावराए ल्योदा भाल्सिद, “चिऊचिके, डाआमार डाभाइर आवर ज़। 35 जोराए परमेस्वरए ओपाँ थैद दोज़्यार, होर ज़ डाआमार डाभाइ बैनीर,” है लिके।

4

धुर वासून्या घर्ती

(मत्ती १३:१-९; लूका ८:४-८)

1 फरी तछा येसु दह छचोक चुसिद परमेस्वरए ओपाँ ओरासथैज़्याव। ओल्योक मिँर बनै ल्यो माल्यो यातावए येसु दोङ्गाल चुसिद दोङ्गालाई रील जाँ होकसै लाँक्यो। माहोल्या भरी ओङ्गाक दह छचोक चुसिकेर। 2 याचुसिउत येसुए नोरालाई ओपाँ घर्ती झा:द यासथैक्यो। तोबो ओरासथैव आव ज़, 3 “थैचिके, तोबो मिँ ओएँ:ल धुर वासूना बाके दी। 4 धुर ओवास्ज्याक ख्वा येम जीदा परिके दी। नो येमलाव परिउ बाज़ाराए ज़्युकेर दी। 5 ख्वा धुर गम छचा छचा ल्यो ओदादरत परिके दी। नत गम छचा छचा वाज़ ल्यो ओतावए हतपत ज़ परीके दी। 6 खाली निमी ओसोराक उहुवत ओजरा नाम जील ओमाल्योए च्याकराप चिकुरूप थँके दी। 7 फरी ख्वा धुर जुर रमराए खाल परिके दी। नोलाई जुर रमराए गाल्द ओसै माल्यो दाँथ्या ताके दी। 8 फरी ख्वा धुर ते चाव गमस्याल परिके दी। नो बनै चावस परीद झें:द ओसै बनै झा:द ख्वात तीस, ख्वात साथी, ख्वात सय दोबोर यासै झा:केर दी। 9 आव पाँ जोए थैन्या उयुँ लिज़्या, चावस ओथैवक,” है लिद यासथैक्यो।

थैज़्यावत ब मातीधुर

(मत्ती १३:१०-१७; लूका ८:९-१०)

10 नो माहोल्थार याबाव छीनी बाह जना उसिसर सोनो ओलस बारिज़्यावराए, “नो नझाःव घर्तीए ओअर्थ काता?” है यादोक ते,

11 येसुए, “जेलाई वाज़ परमेस्वरए ओराज़्यालाव कप्सिउ पाँर छर्लङ्ग सतैसिउ लिज़्या, उपुर्कावरालाई ते घर्ती मिताव ज़ लिज़्या।

12 है जैद ज़,

‘नोराए रँःन्या ते रँःज़्यार, मासरेस्धुर।

थैन्या ते थैज़्यार, मातीधुर।

नितावर यामाताव ताकिन परमेस्वरए ल्योदा यायुँ फर्कैद यापाप ब क्याल्सिखेहो।’ ”

धुर वास्सिउ घर्तीए ओअर्थ

(मत्ती १३:१८-२३; लूका ८:११-१५)

13 नकिन येसुए नोरालाई है यादोकयो, “काता जे मनी नो डाझाःव घर्तीए ओअर्थ जेमासैए रो? छुत झन कै जैद जेतीधुके? 14 धुर

वासज़्याव, परमेस्वरए ओपाँ सथैज़्याव मिँ ज़। 15 नो येमलाव परिउ भरी जोए परमेस्वरए ओपाँ ओथैव प्राईना सैतान हुद उयुँलाव

वास्सिउ पाँ भरी स्याप सिप जैद लाँदिज़्याव। 16 हो मिताव ज़ नो ओदादरताव परिउ भरी जोए परमेस्वरए ओपाँ थैद बेहार ज़

तीद खुसी ब ताज़्या। 17 खाली नो मिँ परमेस्वरए ओपाँत उयुँल ओजरा माल्यो मिताव ओतावए नो पाँ छ्यावा पै वाज़ रहिज़्या।

नो पाँनी नोए ओक्याँत खिरीर उपसिकिन दुखर ओदैकिन नो पाँत उयुँ क्य़ाज़्या। 18 नो ज़ुर रमराए खालाव परिउ भरी आव ज़, नोराए

परमेस्वरए ओपाँ ते थैज़्यार, 19 खाली धन सम्पतीदा यायुँ थू जैद ‘आव गेजिउत कै तान्या ओताव, कातानी थाँतस लिन्या’ लिद वीनी

फुइ ब लिज़्यार। है जैद नितावराए परमेस्वरए ओपाँलाई यागालोए

नो पाँ ओसै माझाःज्याव ताज्या। ²⁰ नो चाव गमसयाल परिउ भरी आव ज़, जोए परमेस्वरए ओपाँ थैद चावस रैद ओसै झाःज्याव धुर स्यासो ख्वात तीस, ख्वात साथी, ख्वात सय दोबोर झाःज्याव।”

दिउ बाल्न्यात तैःसिउ लोसै

(लूका ८:१६-१८)

²¹येसुए फरी तोबो घर्ती अइ लिद झाःक्यो, “सुए ज़ लोसै तैःद जाए माकबो, खात खँल मामोंव। दिउ बाल्न्यात ची झाःव। ²²हिताव ज़ मारैःव भरी तछा रैःन्या ज़ ले, कप्सिउ भरी ब पलाँवल तान्या ले।

²³आव पाँत जोए थैन्या उयुँ लिज्या, ओर्ना घ्याँ जैद ओथैवक।”

²⁴फरी नोरालाई, “जेथैज्याव भरी बनै धिद थैच्यो। किताव गोइँनी जेगोइँज्या, जे मनी हिताव गोइँनी ज़ दैन्या जेले, झन कुधु ब दैन्या जेले। ²⁵है जैद जोए धिद थैज्याव, होए झन ज़ तीधुन्या ले। जोए चावस माथैव, होए झन ज़ थैन्या युँ मादाद डादाडाव ओथैव ब ओपोःस ज़ मान्या ले।”

परमेस्वरए ओराज्या परीज्याव धुर मिताव ज़

²⁶फरी, “परमेस्वरए ओराज्या तोबो मिँए ओएँःल धुर ओवासो मिताव लिज्या। ²⁷नोए धुर ओवासोत स्याँन्या बेलाक स्याँज्या, सोन्या बेलाक सोज्या। उपुर काता येन ज़ ओमादोदी ब नो धुर ओलनी ज़ परीद झेःज्या। कै जैद ओताज्याव ओल ब मासैव। ²⁸गमए ओल ज़ नो धुरलाई सपरीज्याव। है जैद नो धुर डादा तआखला नेआखला ताद झेःद सेःज्या, नकिन ओबाला ब झाःज्याव। ²⁹ओसै उमीःवत नो वासोए ओराँकासीस हुद ओएँःलाव अन भरी एन्ज्याव।”

बाजीए उधुर

(मती १३:३१-३२; लूका १३:१८-१९)

³⁰येसु फरी, “परमेस्वरए ओराज्या किताव उलिज्याव, किताव

अर्थनी पलासूद डायचिके लिक ते, ³¹ परमेस्वरए ओराजूया तोबो बाजीए उधुर स्यासो लिजूया। नो धुर प्राइरानी तकेजा ओतादी ब बारील रूपिक, ³² परीद ओघ्योःवत नो बारीलाव डैंराकिन प्राइरानी घेप्पा ताद ओखारर ब झाःजूयाव।* नत नमताव भुर्जूयाव बाजार ओछेंयाल सिपर जैद बासिजूयार।”

³³मिंराए परमेस्वरए ओपाँ घतीधुरक लिद येसुए इताव कुधु घर्तीर झाःद ओराएजूयाव। ³⁴ घर्ती ओमाझाःवा पै ओमारासथैजूयाव। याबातड याताक उसिसरालाई वाज्ज ओअर्थ भरी पलासूद ओराएजूयाव।

येसुए बतासलाई ओथकनैव

(मत्ती ८:२३-२७; लूका ८:२२-२५)

³⁵हो छचाम रिमक येसुए उसिसरालाई, “दह होफत गेबाया,” है ओरादोक ते, ³⁶ उसिसर नो माहोल्यारास भाःसिद येसु चुसिद उलिजूयाव दोङ्गाल पसिद बाकेर। यास बाजूयावर छुत दोङ्गार ब यालिजूयाव। ³⁷ याबाजूयाक उमँःजानी घ्योःव हुरी बतास हुद रीए ओछल्कार दोङ्गाल पसिद नोलाई गदैवा गदैवा जैक्यो। ³⁸ हो बेलाक येसु दोङ्गाए ओर्मैःत गुम जैद इल्द उलिजूयाव। उसिसराए येसुलाई सोचोइद, “गुर्बा, खदम ज़ गेतारिके, काराव घाइ नमालिजूयाव?” है यादोक ते, ³⁹ येसु सोद बतासलाई सिडार्द रीलाई ब “चिम दोके,” है ओदोव प्राइना ज़ बतास ब थकनिके, री ब अदिके। ⁴⁰ हाःत ज़ येसुए, “जे काराव जेछेःजूयाव, कै जैद जेयुँ ओमाहुपूजूयाव?” है ओरादोक ते, ⁴¹ नोर बनै छेःद या याल, “आव किताव मिं ओताव? बतासर रीराए ब ओपाँ यादोजूयाव,” है लिकेर।

5

खादर पोल लिजूयाव बूलिउ मिं

(मत्ती ८:२८-३४; लूका ८:२६-३९)

* 4:32 4:32 इस्राएल देसलाव बाजी डैं नेमितर सोमितर दँ डैंःव ओताजूयाव।

1 येसु उसिसरास दह होफताव गेरासेनस यादोज्ञयाव पोड केसुद,
 2 येसु दोङ्गातिन उझरिउ प्राइँना ज़ माचाव पुरुसए क्योःद ओनैज्ञयाव तोबो मिँ खादर पोनी पुलुसुद येसुए ल्योक दैसिहुके।
 3 नो मिँ एकतार खादर जीदा ज़ उलिज्ञयाव। नोलाई सुए ज़ साँगलए ब यामाकिधुज्ञयाव। 4 कुधु पाला साँगलए किद, हलाल याझाःदी ब, साँगलर पाता पत० ओराफ्याःज्ञयाव, हलार ब कुतु कुतु केःद ओराख्याज्ञयाव। है जैद सुए ज़ यामाहारैधुज्ञयाव। 5 नो लाकनी रील खादर जीदा, हाँ जीदा चिर चिर किद लुँ लुँराए उरूमसिज्ञयाव।
 6 नोए येसुलाई तादानी उरँःव प्राइँना ओल्योक धोःहुद उखँत फुलुप्सिद, 7 बनै चोइस, “अ येसु, माहान परमेस्वरए ओज़ा, डास नखै काता उलिज्ञयाव? परमेस्वरए उमिननी है डादीज्ञया, डालाई दुख तायॉ,” है दोक्यो। 8 नो माचाव पुरुसलाई येसुए डादा ज़, “ए माचाव पुरुस, आव मिँए ओक्याँतिन पुलुसुद बान्के,” है दाद ओनैज्ञयाव। 9 येसुए फरी, “नमिन कै?” है ओदोक ते, “डामिन फौजी, गो कुधु ज़ गेलिज्ञया,” है दोक्यो। 10 नोराए, “गेलाई आव पोनी तापलेःसियो,” है लिद बिन्ती दोकेर।

11 नो बेलाक ज़ नक तोबो दाँदात ऊर तबगाल यालाज्ञयाव। 12 नो माचाव पुरुसराए, “गेलाई बुरु नो ऊराए क्यॉत बाव यासिके,” लिद बिन्ती यादोक ते, 13 येसुए भैःद याएक्यो। है जैद नो माचाव पुरुसर नो मिँए ओक्याँतिन पुलुसुद ऊराए क्यॉत बाकेर। हो प्राइँना ज़ ऊ भरी बूलिद दाँदातिन सुइँःकिनाद दहल ज़ोःद प्राइँ ज़ सुद सिकेर। नो ऊर नेहजाराकाव बगाल याल्यो।

14 निताव रँःद नो ऊ गावलार धोःनाद सहर जीदा, नाखार जीदा बाद नो यारँःव भरी है यारादोकेर। नो पाँ थैव भरी कै ओताव लिद चिऊना हुवर, 15 येसुए ल्योक याबाक नो माचाव पुरुसराए यारासी मिँ ओक्वार क्वाइसिद सोजोकाव ज़ चुसिद उलिज्ञयाव रँःकेर। निताव रँःद नोर छेःकेर। 16 नो चिऊना हुवरालाई, नो येन रँःव भरिए,

“बूलिउलाई इताव इताव ताके, ऊरालाई इताव इताव ताके,” लिद है यारादोकेर। ¹⁷ है जैद नो गेरासेनस खन्दलाव मिँराए येसुलाई, “आनी पुलुसूद बान्के,” है लिद बिन्ती दोकेर।

¹⁸येसु दोङ्गाल उपसिज्याक नो माचाव पुरूसराए यारासो मिँए, “डालाई ब नँस लाँनाके,” है लिद बिन्ती ओदोक ते, ¹⁹येसुए भैःद मायाद, “बुरू नँ नझिमदा बाद ननै नमेंरालाई, ‘परमेस्वरए डालाई उयुँ नाद डाजूनी आःल्दिउ येन दाद्याँक्यो,’ है लिद यासथैनाके,” है दोक्यो। ²⁰ है जैद नो मिँ देकापोलिस खन्दल बाद ओल उजूनी येसुए ओदोव येन यासथैक्यो। थैज्याव भरी अचम्ब ताकेर।

याइरसए ओजा सिउ ओपैज्याव

(मत्ती ९:१८-१९; लूका ८:४०-४२)

²¹येसु दोङ्गाल ओल्द दह आफत उहुत मिँर बनै माहोल्या दुप्सिहुकेर। ओल दह छचोक ज उलिज्याव। ²²नाःत ज धर्मसासूत्र झिमलाव तोबो याघेप्पा याइरस यादोज्याव नक हुद येसुलाई रँःद उखँत फुलुप्सिद, ²³“जिम्जा मेंमा डाजा सिउ पैज्याव। नँ हुद नोए ओक्याँत नकुइ नैद नएकिन नो गराँद बाँचिन्या ले,” लिद बिन्ती ओदोक ते, ²⁴येसु नोस ज बाके।

झी भोन्या ओबेथा ल्यो मेंमा

(मत्ती ९:२०-२२; लूका ८:४३-४८)

मिँर बनै माहोल्या येसुए उछीं उछीं येमत बनै याछुइसिनाज्याव। ²⁵नो माहोल्याराए याखाल तोबो बाह बर्स भरी ओक्याँतिन झी भोन्या बेथाए क्योःद ओनैज्याव मेंमा ब उलिज्याव। ²⁶नो मेंमा सगराँसिन्याए जूनी वासः जैज्याव कुधुराए ल्योक ओलसकाव लिज्याव भरी ओपोःस ज खेमद ब जात्त ज मागराँके, इन ज हया गती तानाद उलिज्याव। ²⁷है जैद नोए येसुए ओदोव येन भरी थैद माहोल्याराए खाल पसिद येसुए उछींनी हुद ओक्वात छाप्दिक्यो।

28 नो मेंमाए उयुँल उयुँल, “येसुए ओक्वा वाज़ छापो डादैकिन आव बेथानी गरान्या डाले,” है उलिज़्याव। 29 ओछापो प्राइंना नो झी भोन्या बेथा ब गरॉके, ओगरॉव ओक्याँत ब दारसिके।

30 हाःत ज़ येसुए ओक्याँतिन सगरॉन्या सक्ती पुलुसुद ओबाव दारसिद नो माहोल्याराए खार्ल उछींदा फर्किद, “डाक्वात सुए ओछापो?” है ओरादोक ते, 31 उसिसराए, “आः याछुइसिज़्यावल् कै जैद ‘सुए ओछापनाव,’ है नलिज़्याव?” है यादोक ते, 32 येसुए झन ‘सुए ओछापनाव?’ है लिद आदा होदा याचिऊक्यो। 33 नो मेंमा ‘डागरॉके’ लिन्या सैंद ओछचाचेए गूए गूए येसुए उखँत फुलुप्सिद ओक्याँत ताव पाँ भरी ओपोःस ज़ है दोक्यो। 34 येसुए नोलाई, “अ माँ, डालाई नयुँ नसुहुबोनी ज़ नगरॉके। चावस बानी। नबेथाए रासनिक्क्यो,” है दोक्यो।

येसुए याइरसए ओज़ालाई सिउनी ओसोचोइव

(मत्ती ९:२३-२६; लूका ८:४९-५६)

35 येसु नो मेंमास ओपाँज़्याक ज़ धर्मसास्र ज़िमलाव याघेपपा याइरसए उझिमनिकावर हुद याइरसलाई, “गुर्बालाई काराव हत्या यान्या, नज़ा सिधुके,” है दोकेर। 36 नोराए यापाँ येसुए माथैव जैसिद याइरसलाई, “नयुँ तासतेयो, नयुँ वाज़ उहुपक,” है दाद, 37 छुतरालाई ओलस बाव मायाद पत्रुस, याकूब सोनो याकूबए ओभाइ यूहननारालाई वाज़ यालाँक्यो। 38 नो धर्मसास्र ज़िमलाव याघेपपाए उझिमक याकेसोत मिँ बनै चिर्लनी बिर्ल याघर्ज़्याव रँःद, 39 येसु नो ज़िमल पसिद, “काराव इताव च्याउँनी म्याउँ लँःसिद जेघर्ज्याव? लुज़ा मासिए, अइज़ इल्द ले,” है ओरादोक ते, 40 येसुलाई हसैकेर। हाःत ज़ येसुए मिँ भरी लाँःदा परींद नो लुज़ाए ओबाबु ओआमानी सोनो ओलस लिज़्याव स्रोम्लो उसिसरालाई वाज़ लाँद लुज़ाए उकुन्तील पसिद, 41 नो लुज़ालाई उकुइनी क्योःद,

“तालिता कूमी,” है दोक्यो। (तालिता कूमीए ओअर्थ — अ बुची, सोनिके।) ⁴² हो प्राइँना ज़ नो लुज़ा थर च्याँ:सिद आदा होदा लिके। नो लुज़ा बाह बर्सवाकाव ओल्यो। निताव रँ:द नोर बनै अचम्ब ज़ ताकेर। ⁴³ नकिन येसुए, “आव येन सुलाई ज़ है तारादोच्यो,” है लिद अर्थेद, “आवलाई ज़यान्यार जैदिचिके,” है यादोक्यो।

6

येसुलाई ओमान नैद यामायो

(मत्ती १३:५३-५८; लूका ४:१६-३०)

¹ येसु ननी पुलुस्द ओल ओनाखारल ज़ बाके। उसिसर मनी ओलस ज़ यालिज़्याव। ² नासिन्या छचाम उहुवत धर्मसास्त्र झिमक बाद येसुए परमेस्वरए ओपाँ ओरासथैज़्याव। नो पाँ थैज़्यावर बनै अचम्ब ताद, “आवए इताव अचम्बलाव पाँर, अचम्बलाव सक्तीर कातानी ओरैव? आवए ओदैव किताव ग्यान ओल्यो! ³ काता, आव नो सीं तुज़्याव मा:क रो? आव नो गेस लिज़्याव मरियमए ओज़ा ज़ सानी। आव ते याकूब, योसेफ, यहूदा सोनो सिमोनराए यादाज्यु ज़ सानी। ओबैनीर मनी गेस ज़ लिज़्यार,” है लिद जाँ सोव माँ:ती जैकेर।

⁴ येसुए नो यापाँ सैद, “अगमबक्तालाई ओल ओनाखारलावर सोनो ओक्याँदाडावराए वाज़ ओमान नैद माएर, उपुर्कावराए ते नैदिज़्यार,” है यादोक्यो। ⁵ है जैद येसु नक उलिज़्याक अचम्बलाव येनर ब कोसै मादोधुक्यो, खाली तोबो नेब्लो याजोरो हुवरालाई वाज़ याक्याँत उकुइ नैद्याद यासगराँक्यो। ⁶ ओललाई यायुँ ओमाहुपूज़्यावए येसु अचम्ब ताके।

येसुए उसिसरालाई ओरापरींव

(मत्ती १०:१,५-१५; लूका ९:१-६)

येसु ननी पुलुस्द नाखार नाखार बाद परमेस्वरए ओपाँ यासथैनाक्यो। ⁷ हा: बेलाक बाह जना उसिसरालाई ओल्योक

खुल्द नोरालाई नेबरें नेबरें जैद माचाव पुरूसर पलेन्या सक्तीर याद यापरीक्यो, ⁸ “येमत जेबाक जेस काता ज़ तालाँच्यो। जेकुइताव झुइस वाज़ बाच्यो। अर्नी तादी ब, झैं तादी ब, जेवाँ:त पैसा तादी ब, काता ज़ तालाँच्यो। ⁹ जेखँताव पोला सोनो जेक्याँताव क्वास वाज़ बाच्यो,” है लिद याअर्थेक्यो।

¹⁰फरी, “जो झिमक जेपसिज्या नो नाखारनी जेमापुलुसा पै नक ज़ लिच्यो। ¹¹ फरी जेबाव पोल जेलाई ल्यो मायाद जेपाँ ब थैव यामाभै:किन नो पोनी जेपुलुस्क नोरालाई चेतावनी यान्याए जूनी जेखँताव गालो धुइरो ब नल ज़ थरैद ख्यानेद याराएच्यो,” है लिद यापरीक्यो।

¹²है जैद नोर ननी पुलुस्द बाद प्राइँलाई ज़, “मादान्या जेदोज्याव भरी रास्द जेयुँ परमेस्वरए ल्योदा फकैचिके,” है लिद यारासथैकेर।

¹³ मिँराए याक्याँताव माचाव पुरूसर मनी कुधु ज़ यारापलेकेर, याजोरो हुवरालाई ब परमेस्वरए उमिननी मास थीद नोरालाई यारासगराँकेर।

रील सछैँज्याव यूहन्ना उसिउ

(मत्ती १४:१-१२; लूका ९:७-९)

¹⁴हा: बेलाक येसुए उमिन बनै ओथासनावए हेरोद राजाए मनी ओयेनर थैक्यो। येसुए उजूनी ख्वाराए, “आव ते रील सछैँज्याव यूहन्ना जन्द ची उहुव सा। है जैद ज़ ताखेहो ना: सक्तीलाव येनर ओदोज्याव।” ¹⁵ ख्वाराए फरी, “आव ते एलिया ची सा।” ख्वाराए फरी, “भा:काव अगमबक्ता मितावर फरी तोबो उपुलुसो ताखेहो,” है यालिज्याव। ¹⁶ ओल हेरोदए फरी निताव पाँर थैद, “ओहो! ओडै चम्द डसै:व यूहन्ना ते जन्द ची हुके काना,” है लिके।

¹⁷नो हेरोदए डादा ओभाइ फिलिपए ओज्या हेरोदियासए ओपाँनी यूहन्नालाई क्यो:द किद इयालखानाल झा:द ओनैज्याव। हेरोदए हेरोदियासलाई औरैवए, ¹⁸ यूहन्नाए नो राजालाई, “नँ

नभाइए ओज्यालाई रैन्या माताए,” है ओदोक ते, ¹⁹ हेरोदियासए यूहन्नालाई रेंद उरिस चोद, ‘आवलाई कै जैद डसैके’ लिद उयुँल ओनैज्याव। खाली सैन्या मौका ओमादैताव। ²⁰ ओल राजाए ते यूहन्नालाई बनै सतलाव धर्मी मिँ ज़ थरैद ओछेज्याव। है जैद नोए यूहन्नालाई जोगोइद नैक्यो। यूहन्नाए ओपाँत फरी उयुँ आँचानी पाँचा ओताज्यावत ब सर्बा थैन्या युँ ओदोज्याव।

²¹तछा राजा हेरोद उजर्मिउ छचाम मानिन्या उहुवत ओज्याए मौका छुपिक्यो। नो छचाम मानिन्याए जूनी बनै घ्योःव भत्यार जैद घ्योःव घ्योःव ओकर्मचारीर, फौजीलाव ओअफिसरर सोनो गालीललाव घ्योःव घ्योःव मिँरालाई याखुल्क्यो। ²² नो बेलाक ज़ हेरोदियासए मेंमा ओजा नो भत्यार ज्युना हुवराए याडाक बाद स्याद याएक्यो। राजा हेरोद सोनो ओपाहुनार बनै खुसी ताद राजाए नो लुज़ालाई, “नँ जो नपैज्या डस न्निके, हो ज़ डयाँ,” है दोक्यो। ²³ फरी, “नँ नपैकिन तभा डाराज्या तादी ब डयाँ,” है लिद किर्या झाःक्यो। ²⁴ है जैद नो लुज़ा ओआमाए ल्योक बाद, “आमा, डा काता डान्निके?” है ओदोक ते, ओआमाए, “रील सछैँज्याव यूहन्नाए ओडै न्निके,” है दोक्यो।

²⁵नो लुज़ा बेहार ज़ राजाए ल्योक बाद, “डालाई रील सछैँज्याव यूहन्नाए ओडै ताथील झाःद आख ज़ याँके,” है दोक्यो। ²⁶ राजाए नो पाँ थैद उयुँर स्यासे सतेक्यो। खाली ओपाहुनाराए डाक किर्या ओझाःवए नो लुज़ाए ओपाँ माख्याधुक्यो। ²⁷ है जैद ओपाल्यारानी तोबोलाई खुल्द, “इयालखानाल लिज्याव यूहन्नाए ओडै चमूद रैके,” है दाद परीक्यो। नो इयालखानाल बाद यूहन्नाए ओडै चमूद, ²⁸ ताथील झाःद नो लुज़ालाई रैदिक्यो। नो लुज़ाए फरी ओआमालाई लाँदिक्यो। ²⁹ छीनी यूहन्नाए उसिसराए नो पाँर थैद ओमोरोलाई चिहुद लाँद गादैकेर।

येसुए पाँच हजारलाई भरेस ओरायो

(मत्ती १४:१३-२१; लूका ९:१०-१७; यूहन्ना ६:१-१४)

30 येसुए नो ओरापरीं व ओसाचीर ओल्द हुद ओल्योक दुप्सिद यादोव येन भरी, यारासथैव पाँ भरी है दोकेर। 31 नकिन येसुए नोरालाई, “जे जाँवा पै नासिन्याए जूनी डास तोबो साइँसुइँवक हुव ताके,” है यादोक्यो। काराव ल्यो ताकिन हो बेलाक मिँर याल्योक बनै कुधु ज़ आदा होदा लिन्यार यातावए काँर ज़यान्या ब यामाधा: ज़याव। 32 है जैद येसु उसिसरास दोङ्गाल पसिद तोबो साइँसुइँव पोक बाकेर। 33 खाली मिँराए याबाज़याव रँ:द, “नोर ज़ याल्यो,” लिन्या सरेस्द प्राइँनी ज़ धोँ:हुद दह छयो छयो बाद नोरालाई बलेद याडात ज़ केस्नाकेर। 34 येसु दोङ्गातिन उझरिउ प्राइँना मिँर बनै माहोल्या यारँ:क्यो। नोर यागावला माल्यो बेधा स्यासोर यातावए येसुए उयुँ नाद परमेस्वरए ओपाँर कुधु ज़ यासथैक्यो।

35 जाँ रिमदा रिमदा येसुए उसिसर ओल्योक हुद, “गे इताव साइँसुइँवक गेलिज़्या, नम ब नुप्नाके। 36 आव माहोल्यारालाई आजीलाव नाखार जीदा यापरींके, ज़यावर लँ:द घज़्युरक,” है यादोक ते, 37 येसुए, “आवरालाई ज़यावर जे ज़ याव ताके,” है ओरादोक ते, उसिसराए, “हुकी आवरालाई नेसय तोला चाँदीए उमींवा भरेस रैद्यान्या है नलिज़्याव रो?” है यादोक ते, 38 येसुए, “जेस भरेस खागोता उलिज़्याव, चिऊनाचिके,” है ओरादोक ते, नोर चिऊनाद गनिद, “गेस भरेस पाँच गोता, डाँ: नेब्लो वाज़ लिज़्या,” है दोकेर।

39 हा:त ज़ येसुए उसिसरालाई नो माहोल्यारालाई पीं व छी ल्यो बाँल ताना ताना जैद सोचोइँव यापरींक्यो। 40 नोर पचास पचास

सोनो सय सयलाव ताना जैसिद चुसिकेर। 41 हाःत ज़ येसुए नो पाँच गोता भरेस नेब्लो डाँः उकुइत रैद स्वर्गदा भाल्सिद, असिक निद भरेसर केःद उसिसरालाई नो माहोल्याराए याड़ाक याड़ाक भाःद्याव यापरींक्यो। फरी नो नेब्लो डाँःनिलाई मनी हिताव ज़ जैद भाःद याएक्यो। 42 नोर प्राईंए याफू तसी ज़्युकेर। 43 नो यासयेलो भरेस सोनो डाँःए उकुतुरार यादुपूक बाह झुर्नु ताके। 44 नो भरेस ज़्याज्यावर खेपार वाज़ पाँच हजारा याल्यो।

येसु री तर्त तर्त ओबाव

(मत्ती १४:२२-३३; यूहन्ना ६:१५-२१)

45 हाःत ज़ येसुए उसिसरालाई दोङ्गल पसिउ परींद दह होफताव बेथसेदा यादोज्याव पोदा ओलकिन डादा ज़ यापरींक्यो। ओल येसुए ते नो माहोल्यारालाई याङ्गिमदा याङ्गिमदा ओरापरींज्याव। 46 नोरालाई ओरापरींधुव छींनी ओल तोबो दाँदात बाद पोखारिनाक्यो।

47 नम ओइयानाक उसिसर दोङ्गात दह माँजल ज़ यालिज्याव। येसु ओबातड पाखाक उलिज्याव। 48 छींनी बतास उसिसराए ल्योदा बनै चोइस हुद नोर यादोङ्गालाई बनै धो धो यालाँज्याव। येसुए नोरालाई रँःद रीलाव तीन बजेवाक री तर्त तर्त याल्योदा ज़ बाके। यालापनिकाव घ्याँ बाव ओपैज्याक, 49 नोराए येसुलाई री तर्त तर्त उहुज्याव रँःद, “आव ते इया ची सा!” लिद, 50 बनै छेःद चिर चिर किकेर। हाःत ज़ येसुए, “ताछेःच्यो, जेयुँ होलाँ जैचिके, डा ची,” है दाद, 51 यास दोङ्गल उपसिउ प्राईंना ज़ बतास ब थकनिके। निताव रँःद उसिसर बनै अचम्ब ताकेर। 52 येसुए निताव भरेस ओसबाव रँःद ब ओयेन चावस यामाथरैताव। यायुँ बनै खाव ओतावए मातीधुकेर।

येसुए याजोरो हुवरालाई ओरासगराँव

(मत्ती १४:३४-३६)

53 दह होफताव गनेसरेत यादोज्याव पोड केसूद यादोज्जालाई दह छचोक सुर्द, 54 पाखाक यापुलुसो प्राइंना नलाव मिँराए येसुलाई बेहार ज़ सरेसूद, 55 नजीलाव भरिल सरसाप बाद याजोरो हुव भरिरालाई याझेलोझारास घुर्द येसु जोक जोक बाज्या होक होक ज़ यारालाँकेर। 56 है जैद सहरल तादी ब, नाखारल तादी ब, पाखाड तादी ब येसु जोक बाज्या, होक ज़ मिँराए याजोरो हुवरालाई तोबोक यारादुपूज्याव। नोराए, “नक्वाए उतुपा वाज़ छापो गेदैक,” है दाद छापो भरी ओपोःस ज़ गरँकेर।

7

यहूदीराए यापुर्खारानी हुव चलन

(मत्ती १५:१-९)

1 यरूसलेमनी हुव फरिसीर सोनो सास्त्रीर येसुए ल्योक यादुप्सिउत, 2 येसुए ख्वा ख्वा उसिसराए याकुइ माचोखोइसिद काँ याज्युज्याव यारारँकेर। 3 फरिसीर सोनो उपुर्काव यहूदी भरिराए यासाखा पुर्खारानी हुव चलन दाद याकुइ यामाचोखोइसिवा पै काता ज़ यामाज्युज्याव। 4 फरी बजारनी याहुवत ब रीए यामाचोखोइसिवा पै काता ज़ यामाज्युज्याव। छुत भाःकिनकाव चलनर ब कुधु ज़ यादोज्याव, कैताक जार याचोखोइज्याव, कैताक खुरीर भोप्कार याचोखोइज्याव।

5 है जैद नो फरिसीर सोनो सास्त्रीराए येसुलाई, “नसिसराए काराव गेसाखा पुर्खारानी हुव चलन यामादोज्याव? आवराए याकुइ माचोखोइसिद ज़ ज्युज्यार,” है यादोक ते, 6 येसुए, “जे मिताव कैफतीराए जूँनी यसैयाए डादा ज़ थिक सर्द नैद्याचिउ। नोए ओसरो आव ज़,

‘आवराए यायाःए वाज़ डामान नैद्याँज्यार।

यायुँ ते डाकिन तादाड लिज्या।

7 मिँराए याससैव चलनलाई सघ्योःद,

अनाकल ज़ डासेवा दोज़यार।’

8 है जैद जे परमेस्वरए ओकानुनलाई रास्द झन मिर्राए याजैव चलनलाई जेमानीज़्या। 9 निताव दान्यात बनै ज़ जेजमकैज़्या — परमेस्वरए ओकानुनलाई ख्याद, जेचलनलाई जेसघ्योःज़्या। 10 अछादी परमेस्वरए ओकानुन सर्ज़्याव मोसाए इताव सर्द नैव, ‘बाबु आमाए ओमान नैद्याव ज़ परिए।’

सोनो,

‘जोए ओबाबु ओआमाए उमिन बलेःदिज़्याव, होलाई सैःव ज़ परिए।’

11-12 जे ते झन, ‘जोए ओबाबु ओआमानीलाई, ‘जिन डानिकाव दैव परिन्या भरी कुर्बान ताद ले,’ है उलिकिन, नो मिँलाई ओबाबु ओआमानी निभार मालागिद काता ज़ याव मापरिए,’ है जेलिज़्या। (कुर्बानए ओअर्थ — डाधन भरी परमेस्वरए उमिनत नैसिउ लिज़्या।) 13 है जैद जे निताव जेसाखा पुर्खारानी हुव चलननी परमेस्वरए ओपाँलाई अनाकलाव ज़ जेजैज़्या। हो मिताव येन छुत मनी कुधु ज़ जेदोज़्या,” है यादोक्यो।

मिँलाई बलेःन्या पाँ

(मत्ती १५:१०-२०)

14 नकिन येसुए नक लिज़्याव माहोल्यारालाई ओल्योदा खुल्द, “आव डापाँ जे भरिए थैद चावस थरैच्यो, 15 पाखानी क्याँल पसिज़्यावए मिँलाई माछैव माजैधुव। मिँलाई माछैव जैज़्याव ते क्याँनी पुलुसज़्यावए ची। 16 [आव पाँ जोए थैन्या उयुँ लिज़्या, चावस ओथैवक,]” है लिद यासथैक्यो।

17 हाःत ज़ येसुए नो माहोल्यारालाई ख्यानैद तोबो झिमल उपसिउत उसिसराए नो पाँए ओअर्थ सुधिकेर। 18 येसुए, “जे मनी अझ डापाँ जेमातीधुज़्याव रो? याःनी पसिज़्याव ज़्यावए मिँलाई माबलेव

लिन्या जेमासैए रो? 19 नो ज्ञ्याव युँदा माबाए, अइज्ज फूल पसिद छीनी पुलुसूद बाज्या।” नो पाँनी ज़ येसुए ज्ञ्याव भरी चोखो ज़ थरैक्यो। 20 फरी, “मिँलाई बले-ज्ञ्याव ते युँल सिजैद याःनी पुलुसज्ञ्याव पाँए ची। 21 युँलाव माचाहिउ पाँर आवर ज़ — माचाव चेतैन्या, पातर्या पातर्नी जैसिन्या, कुन्या, मिँ सैःन्या, अर्काए ओज्याए ल्योदा बान्या, 22 अर्काए उमीं कोसै रँःन्या, माचाव येन दान्या, धुत पाँन्या, जोत ब युँ मानैधुन्या, मी तून्या, अर्काए उमिन बले-घान्या, स०द सघ्योःसिन्या, उतीं माल्यो जैसिन्या, 23 आवर ज़ युँनी पुलुसूद मिँलाई बले-न्या पाँर।”

छुत जातलाव सिरियालाव मेंमा

(मत्ती १५:२१-२८)

24 येसु ननी पुलुसूद तुरोस सोनो सीदोन खन्द त०दा बाके। नल तोबो झिमल पसिद, ‘आल डाहुव सुए ज़ यामासैकिन ताखेहो,’ है उलिज्ञ्यावत ब मामोसिधुके। 25 बेहार ज़ तोबो मेंमाए, ‘येसु हुके दी’ लिन्या थैद ओल्योक हुद उखँत फुलुप्सिके। नोए मेंमा ओज़ालाई माचाव पुरूसए क्योःद ओनैज्ञ्याव। 26 ओल मेंमा फरी ग्रीक जातलाव ओल्यो, उझिम सिरिया फोनिके खन्दल ओल्यो। नोए, “अ प्रभु, डाज़ाए ओक्याँताव माचाव पुरूस पलेद एके,” लिद बिन्ती चरैःव ज़ ओनैज्ञ्याव। 27 येसुए फरी, “लुज़ाराए याज्ञ्युज्ञ्याव ज्ञ्याव नैद काःरालाई* यान्या माताए। डादा लुज़ार घवाँःरक,” है ओदोक ते, 28 नो मेंमाए, “हैज्ज प्रभु, हैदी ब लुज़ाराए यासयेलो ज्ञ्यावर तेबल खँकाव काःराए मनी ज्ञ्याव दैर सानी,” है ओदोक ते, 29 येसुए, “आव नपाँए ज़ नज़ाए ओक्याँताव माचाव पुरूस पुलुसूद बाधुके, नँ नझिमदा चावस बान्के,” है ओदोक ते, 30 नो मेंमा उझिमक

* 7:27 7:27 यहूदीर या सघ्योःसिद छुत जातलावरालाई काः मितार याडम्सिज्ञ्याव। खाली आव पाँ येसुए नो मेंमालाई सजिमन्याए जूनी माःक, उयुँ उहुपज्ञ्याव सै ओमाहुपज्ञ्याव लिद ओजाँचिउ ची।

ओबाक ओज़ालाई तैत घ्याँसिद उलिज़्याव रँःक्यो। माचाव पुरूस ओबाधुव ओल्यो।

येसुए ओर्ना माथासोलाई थैन्या ओजैव

³¹नकिन येसु तुरोसनी पुलुसुद सीदोन सोनो देकापोलिसलाव घ्याँ गालील दह छचोक बाके। ³² नलाव मिँराए येसुए ल्योक तोबो ओर्ना माथासो सोनो मापाँधुन्यालाई रैद, “आवए ओक्याँत नकुड नैद सगराँके,” है यादोक ते, ³³ येसुए नोलाई माहोल्यारानी अछतड लाँद ओआडुला ओर्ना कुँल झाःद्याद ओसेत उतिल झाःद्याद, ³⁴ नमदा परमेस्वरए ल्योदा भाल्सिद, ख्योःव स० दोहोरैद नो मिँलाई, “इफ़फाता,” है दोक्यो। (इफ़फाताए ओअर्थ — नर्ना ओफैसिक।) ³⁵ हो प्राईना ज़ नो मिँए ओर्ना फैसिद थैन्या ताके। ओसेर ब पलासुसिद चावस ज़ पाँके। ³⁶ हाःत ज़ येसुए नक लिज़्यावरालाई, “आव डादोव येन सुलाई ज़ है तारादोच्यो,” है लिद याअर्थैक्यो। खाली नोराए खा ओराअर्थैव हाःज़ नो पाँलाई फीजैद यारासथैकेर। ³⁷ नोर बनै अचम्ब ताद, “काता आः चाव येन ओदोज़्याव। यार्ना माथासोरालाई ब थैन्या याजैज़्याव, मापाँधुन्यारालाई ब पाँधुन्या याजैज़्याव,” है यालिज़्याव।

8

येसुए चार हजारलाई भरेस ओरायो

(मत्ती १५:३२-३९)

¹फरी तछा येसुए ल्योक मिँर बनै माहोल्या दुप्सिहुद यालिज़्याव। यास ज़यान्यार प्राई खेम्द उलिज़्याव। है जैद येसुए उसिसरालाई ओल्योदा खुल्द, ² “आव माहोल्यार रँःद डायुँ नाज़्या। आवर डास याल्यो आछिम सोला ताकेर। याज़्याव भरी ब खेम्के। ³ आवरालाई अइज़ ज़िमदा परीकिन येमत याकरेए माधुन्या लेर। आवर ख्वा ख्वार ते तादानी हुवर लिज़्यार,” है ओरादोक ते, ⁴ उसिसराए, “इताव साईसुइँवक आःकाव मिँरालाई कातानी

ज्यावर रैद सव्रॉन्या की?" है यादोक ते, ⁵ येसुए, "जेस भरेस खागोता उलिज्याव?" है ओरादोक ते, "भरेस सात गोता लिज्या," है दोकेर।

⁶नकिन येसुए नो माहोल्यारालाई नामक चुसिउ परींद नो सात गोता भरेस उकुइत रैद, धन्याबाद चरै:द नो भरेसलाई के:द उसिसरालाई नो माहोल्यारालाई भा:द्याव ओरापरींक ते, भा:द याराएकेर। ⁷ नोरास डाँ:जूर ब नेबरेंवा यालिज्याव। येसुए नोरालाई मनी उकुइत रैद, असिक निद माहोल्याराए याड़ाक याड़ाक भा:द्याव यापरींक्यो। ⁸ नोराए याफू तसी ज्याद यासयेलो यादुपूक सात झुर्नु ताके। ⁹ नो भरेस ज्युज्यावर चार हजार याल्यो। नकिन येसुए नो माहोल्यारालाई याझिमदा याझिमदा यापरींक्यो। ¹⁰ ओल बेहार ज़ उसिसरास दोङ्गाल पसिद दलमनुथा खन्द जीदा बाकेर।

फरिसीराए स्वर्गताव सरेस याखिमो

(मत्ती १६:१-४)

¹¹नल फरिसीर येसुलाई जाँचिन्याए जूनी ओल्योक हुद खर्लेसिद, "गेलाई स्वर्गताव नसरेस तोबो सतैद्याव ताके," है यादोक ते, ¹² येसु ओनालर क्र्याद, "आव जुकलाव मिँराए काराव सरेस वाज़ याखिमज्याव? डा साचो है डादाचिज्या, आव जुकलाव मिँराए डासरेस काता ज़ दैन्या मालेर," है दाद, ¹³ नोरालाई ख्यानैद उसिसरास दोङ्गाल पसिद दह होफत बाकेर।

फरिसीराए यापाँनी जोगोइसिन्या

(मत्ती १६:५-१२)

¹⁴येसुए उसिसराए यास भरेस लाँन्या में:द यानैज्याव। दोङ्गाल नोरास भरेस तोबो वाज़ उलिज्याव। ¹⁵ याबाज्याक येसुए नोरालाई सम्जैद, "जे हेरोद राजा सोनो फरिसीराए भरेसल याझा:ज्याव वास:नी जोगोइसिद लिच्यो," है ओरादोक ते, ¹⁶ नोर, "भरेस रैन्या गेमें:वए नै ओदासिज्याव ताक्या," है लिद या याल

यापाँनाज्याव 17 येसुए थैद, “काराव डापाँलाई झन भरेस तंदा जेथरैनाज्याव? आ:पै जेमातीधुइ रो? काता जेयुँ आ: खाव उलिज्याव? 18 जेमी लिज्यावत ब जेमारेँ:धुज्याव रो? जेर्ना लिज्यावत ब जेमाथैधुज्याव रो? काता घरी जेमेँ:धुव, 19 पाँच गोता भरेसए पाँच हजारए याफू तसी ज्यादकाव यासयेलो जेदुप्क खाझुनु ओताव?” है ओरादोक ते, “बाह्र झुनु ताके,” है दोकेर। 20 “फरी सात गोता भरेसए चार हजार मिँए याफू तसी ज्यादकाव यासयेलो जेदुप्क खाझुनु ओताव?” है ओरादोक ते, “सात झुनु ताके,” है दोकेर। 21 येसुए फरी, “कै जैद आ:पै जेमाबुझिधुज्याव?” है यादोक्यो।

येसुए उमी मारैँ:वलाई ओसगराँव

22नकिन येसु उसिसरास बेथसेदा नाखारल बाकेर। नक मिँराए तोबो उमी मारैँ:वलाई ओल्योक रैद, “आवलाई छुद सगराँके,” है यादोक ते, 23 येसुए नो उमी मारैँ:वलाई उकुइनी क्यो:द दोरैद नाखारनी अछतड लाँद, उमीत तिल्याद ओक्याँत उकुइ नैद्याद, “कातार नमारैँ:ज्या?” है ओदोक ते, 24 नोए आदा होदा भाल्सिद, “रँ:न्या ते डारैँ:ज्या, खाली मिँर ते सीर आदा होदा याबाज्याव स्यासो डारारैँ:ज्या,” है दोक्यो। 25 हा:त ज़ येसुए फरी नोए उमीत उकुइ नैद ओएक ते नो मिँए लँ लँ चिरुद प्राईँ ज़ छर्लङ्ग रँ:क्यो। 26 है जैद येसुए नोलाई, “नाखारल मापसिद ज़ नझिमदा बान्के,” है दाद परीँक्यो।

पत्रुसए येसुलाई स्त्रीस लिन्या ओथरैँव

(मत्ती १६:१३-२०; लूका ९:१८-२१)

27नकिन येसु उसिसरास कैसरिया फिलिप्पी सहर लापजीकाव नाखार नाखार याबाज्याक येमत येसुए उसिसरालाई, “डालाई मिँराए सु है दाँज्यार?” है ओरादोक ते, 28 उसिसराए, “ख्वाराए

रील सछैँज्याव यूहन्ना है दींज्यार, ख्वाराए एलिया है दींज्यार, ख्वाराए फरी काताकाव अगमबक्ता ताक्या है दींज्यार,” है यादोक ते, ²⁹येसुए, “जे डालाई सु है जेदाँज्या नी?” है ओरादोक ते, पत्रुसए, “नँ ख्रीस ज़,” है दोक्यो। ³⁰नकिन येसुए नोरालाई, “डा हो ज़ लिद सुलाई ज़ है तारादोच्यो,” है दाद याअर्थेक्यो।

येसु उसिन्याए जूनी डादा ज़ ओपाँव

(मत्ती १६:२१-२३; लूका ९:२२)

³¹हो बेलाक येसुए, “डा मिँ मिन्सिउए कुधु दुखर दैद आव गेदेसलाव सेरर, मुख्या पुजारीर सोनो सास्त्रीराए ल्योनी सोसी निन्या डातारिज्या। नोराए यासैःनाव स्रोलात सिउनी सैसिद डामोरिज्या,” है दाद, ³²उसिसरालाई ओक्याँत हुरिज्याव दुखर डादाकिन ज़ छर्लङ्ग सतैद याएक्यो। हाःत ज़ पत्रुसए येसुलाई तँदा लाँद उसिडार्क ते, ³³येसु उछीँदा फर्किद उसिस भरिरालाई चिऊद पत्रुसलाई, “ए सैतान, डाडाकिन पुलुसनिके। नँ नयुँ परमेस्वरए ल्योदा माझाःद मिँराए याझाःज्यावदा नझाःके,” है दोक्यो।

येसुए उसिस जैसिन्या

(मत्ती १६:२४-२८; लूका ९:२३-२७)

³⁴नकिन येसुए उसिसर सोनो नक लिज्याव माहोल्यारालाई ओल्योक खुल्द प्राईलाई ज़, “जोए डस हुन्या युँ दोज्याव, होए उजिउए मया मादाद क्रुसत सिन्या मिताव दुखर सहिद डाछीँत उहुक। ³⁵जोए आव उजिउत ओललाई तान्या वाज़ खिमज्याव, होए उजुनीलाई समैज्याव। फरी जोए आव उजिउत उजिउए मया मादाद डाजूनी सोनो चाव थाए उजूनी दोज्याव, होए जुनी दैरिज्याव। ³⁶जोए आव मानुवात लिज्याव भरी दुप्द उजुनीलाई ओसमैकिन नोलाई काता फाइदा ची तायादा? ³⁷नोए उजुनीए ओपोल काता यान्या? ³⁸जो आव पापी जुकलाव परमेस्वरकिन तँदाडाव मिँराए खार्ल डा सोनो डापाँत ओलाज हुज्या, डा मिँ मिन्सिउ ब फरी छैँव

डाचाकर्यारास डाबाबुए ओज़गै मगैरास डाहुक डा ब नोलाई रँ:द डालाज हुन्या ले,” है लिद यासथैक्यो।

9

1फरी, “डा जेलाई साचो है डादाचिज़्या, आकाव च्याँ:सिद लिज़्यावरानी जे ख्वा ख्वाराए परमेस्वरए ओराज़्या ओसत्तीरास उहुज़्याव जेमरँ:वा पै सिन्या जेमाले,” है यादोक्यो।

येसुए ओज़गै ओसरँ:व

(मत्ती १७:१-८; लूका ९:२८-३६)

2नकिन छ दिनत येसुए पत्रुस, याकूब सोनो यूहननारालाई याबातड तोबो झें:व गोंत ओलस यालाँक्यो। नक याकेसोत येसुए ओक्याँर तोसिद, 3 ओक्वार बनै मी झी:न्या, तक तकौ ताके। आव मानुवात सुए ज़ जती छेदी ब निताव तक तकौ माजैधुर। 4 ना:त ज़ एलिया सोनो मोसानी नक ज़ सरँ:सिद येसुस पाँकिनी। 5 नो रँ:द पत्रुसए येसुलाई, “गुर्बा, गे आक लिन्या बनै चाव ताके। गे जेलाई सोम्लो पाल तङ्गद गयाच्यो, तोबो नँलाई, तोबो मोसालाई, तोबो एलियालाई,” है दोक्यो। 6 बनै याछे:वए पत्रुसए काता पाँन्या लिन्या ब ओमासैज़्याव। 7 ना:त ज़ बादल तोबो हुद नोरालाई याकपूक्यो। नो बादल जीनी तोबो गा अइ लिद थास्के, “आव डायुँलाव डाज़ा ज़, जे आवए ओपाँ थैच्यो,” 8 है उलिज़्याव याथैव प्राईना नोर आदा होदा याभाल्सिक उपुर सु ज़ यामाल्यो, येसुलाई वाज़ रँ:केर।

खीसकिन डादा एलिया

(मत्ती १७:९-१३)

9नो गोंतिन याज़रिज़्याक येसुए नोरालाई, “आव जेरँ:व भरी डा मिँ मिन्सिउ सिद डामासैसिवा पै सुलाई ज़ है तारादोच्यो,” है ओरादोक ते, 10 नोराए सुलाई ज़ है मादाद या याल वाज़, “आव सिद सैसिन्या है उलिज़्याव पाँ काता ओताव?” है यालिज़्याव।

11 नोराए येसुलाई फरी, “सास्त्रीराए काराव ख्रीसकिन डादा एलिया हुन्या ले है यालिज्याव?” है यादोक ते, 12 येसुए, “हैज़, एलिया डादा ज़ हुद प्राईलाई ताव परिन्या मिताव जैन्या ले। हैदी मनी आव ब सर्सिउ लिज्या — हो बेलाकाव मिँराए मिँ मिन्सिउलाई दुखर याद बीज्यात जैन्या लेर। 13 खाली डा जेलाई आव मनी है डादाचिज्या, एलिया ते डादा ज़ हुधुके। आलाव मिँराए झन किताव सर्सिउ ओल्यो हिताव ज़ जैद नोलाई यामन लागिउ ज़ जैकेर।”

माचाव पुरुसए ओक्योःव छोर्या

(मत्ती १७:१४-२१; लूका ९:३७-४३)

14 येसु नो सोम्लोरास उपुर्काव उसिसराए ल्योक याकेसनाक बनै माहोल्या मिँराए याखाल धिरिद सास्त्रीर नोरास याखर्लेसिज्याव यारारँःकेर। 15 हाःत ज़ नो माहोल्याराए येसु उहुज्याव रँःद नोर बनै अचम्ब ताद ओल्योक धोःनाद धो यादोक, 16 येसुए नोरालाई, “काताए जूनी जेखर्लेसिज्याव?” है ओरादोक ते, 17 माहोल्यारानी तोबोए, “गुर्बा, डा नल्योक डाज़ालाई रैद डानै। नोलाई माचाव पुरुसए लाता जैद नैव। 18 नो पुरुस ओक्याँत उहुव बेलाक झन नामक पछारिसिद, ओहार सजम्द, ओयाःनी फुइ गज्या पलेःद बनै ख्याङग्याँ खेङ्गे जैज्याव। डा नसिसरालाई, ‘माचाव पुरुसलाई पलेःदिचिके,’ है डारादोक ते मापलेःधुकेर,” है दोक्यो। 19 हाःत ज़ येसुए, “ए जेयुँ माहुबोर, डा जेस खा ची डालिरिज्याव, खा डासहिचिके! नोलाई डाल्योक रैचिके,” है ओरादोक ते, 20 नो छोर्यालाई ओल्योक रैदिकेर। हाःत ज़ नो पुरुसए येसुलाई उरँःव प्राईना ज़ नो छोर्यालाई बेहार ज़ खागरा खगर० जैक्यो। नो छोर्या नक ज़ गुधु धलिद फलीं फलीं पलतैसिद ओयाःनी फुइ गज्या पलेःक्यो। 21 येसुए छोर्याए ओबाबुलाई, “आव खर्किन अइ ओताव?” है ओदोक ते, ओबाबुए, “ज़िम्ज़ाकिन ज़,” है दोक्यो।

22 फरी, “आव डाज़ालाई सैःन्याए जूनी कैताक मेंःल ब ख्याज़्याव, कैताक रील ब ख्याज़्याव। नँ कातार नदोधुकिन गेल्योदा नयुँ नाद सगराँघाव ताके,” है ओदोक ते, 23 येसुए, “नँ कै जैद डालाई, ‘कातार नदोधुकिन,’ है नदाँज़्याव? उयुँ हुबोलाई मातान्या काता ज़ माले,” है ओदोक ते, 24 नो छोर्याए ओबाबुए, “अ प्रभु, डायुँ हुबो ज़ लिज़्या, माहुबो डायुँलाई सुहुपुँघाँके,” है लिद बनै चोइस ज़ है दोक्यो।

25 हाःत ज़ येसुए मिँर बनै काला मुलु याधोःहुज़्याव रँःद नो माचाव पुरूसलाई सिडार्द, “ए लाता भैरा जैन्या पुरूस, नोए ओक्याँतिन पुलुसुद बान्के। फरी नल खर्क ज़ तापसिनी,” है ओदोक प्राइँना ज़, 26 नो माचाव पुरूस बनै चिर चिर क्रिद नो छोर्यालाई कारापनी कुरूप जैद पुलुसुद बाके। हाःत ज़ नो छोर्या चबनै सिउ स्यासो ओतावए नो भाल्सिज़्यावराए, “उसिउ ची ओल्यो,” है लिकेर। 27 खाली येसुए नोलाई उकुइनी क्योःद पौला ओसोचोइक ते थर च्याँःसिके।

28 छींनी येसु उसिसरास झिमल याबातड यातावत उसिसराए, “गे कै जैद नो माचाव पुरूसलाई गेमापलेःधुव?” है यादोक ते, 29 येसुए, “इताव पुरूसलाई पलेःन्या ते मापोँखारिवा पै मापलेःसिधुइ,” है यादोक्यो।

येसु उसिन्याए जूनी फरी ओपाँव

(मती १७:२२-२३; लूका ९:४३-४५)

30 येसु उसिसरास ननी पुलुसुद गालील खन्दलाव घ्याँ बाकेर। ‘आल गेलिज़्याव सुए ज़ तासैरक’ है उलिज़्याव, 31 काराव ल्यो ताकिन उसिसरालाई वाज़ पैन्या ओपैँज्याव। नोए, “डा मिँ मिन्सिउलाई तछा मिँराए याकुइत सँपिनारिज़्यार। नोराए डालाई सैःनारिज़्यार। हैदी ब डासिउ सोंलात सैसिद डसोरिज़्या,” है

यादोक्थो। ³² नोराए नो पाँ यामाबुझिदी ब येसुलाई सुधिन्या छेकेर।

घेप्पा जैसिन्या पाँ

(मत्ती १८:१-५; लूका ९:४६-४८)

³³नकिन येसु उसिसरास कफर्नहुमल बाकेर। झिमल यापसितत येसुए उसिसरालाई, “येमत जे काता खास खासनी खुस खुस जेपाँहुज्याव?” है ओरादोक ते, ³⁴ नोराए सुए ज़ घाइ मादोकेर, काराव ल्यो ताकिन नोर येमत, “गे सु घेप्पा गेलिज्याव,” लिद याखर्लेसिहुज्याव। ³⁵ है जैद येसु नक चुसिद बाह जना उसिसरालाई ओल्योक खुल्द, “जो प्राइरानी झत जैसिउ पैज्याव, हो प्राइराए याधूलाव जैसिद प्राइए यासेवा दान्या ओजैसिक,” है दाद, ³⁶ तोबो ज़िमज़ा लुज़ालाई रैद याझाक सच्यौद, नो लुज़ालाई ओघोइँल छींद, ³⁷ “जोए डामिनत आव मिताव ज़िमज़ारालाई यासुमज़्याव, होए डालाई ब सुमनाज्याव। जोए डालाई सुमनाज्याव, होए डालाई वाज़ माःक, डालाई परीज्यावलाई ब सुमज़्याव,” है यादोक्थो।

गेकिन तँदा लिज्यावर

(लूका ९:४९-५०)

³⁸यूहन्नाए, “गुर्बा, तोबोए नमिननी माचाव पुरूसर ओरापलेज्याव गेरँके। नो गेस ओमाल्योए पलेव गेमाएके,” है ओदोक ते, ³⁹ येसुए, “नोलाई तावैच्यो, जोए डामिननी सक्तीलाव येन दोज्याव, होए सिती मिती डामिन बलेद मायाँव। ⁴⁰ जो गेकिन तँदा माजैसिए, हो गेस ज़ लिज्या। ⁴¹ डा जेलाई साचो है डादाचिज्या, जोए जेलाई खीसए उमीर जेल्यो लिद सरेसूद डामिननी तुखुरी री वाज़ ओयाचिदी ब नोए उइनाम जुनी ब दैन्या ज़ ले।”

मिँलाई बलेज्याव खँ कुइ

(मत्ती १८:६-९; लूका १७:१-२)

⁴²फरी, “जोए आव मिताव डालाई यायुँ हुबो ज़िमज़ारालाई पापल

ओरापारैकिन, नितावलाई ते बुरू ओधेल राँथै सुर्द्याद समुन्द्रल ख्यान्या पाथ लिज्या। 43 फरी नकुइए माचावल ओपारैनिकिन नोलाई च्मके। नो नकुइए नर्गलाव माजिपूतिन्या मेंःल ख्याव ओदोज्याव देखा बुरू अजम्बरी जुनील थूँद्यासो पसिन्या पाथ लिज्या। 44 [नर्गलाव रूइराए याभोगोन ब खर्क ज़ माखेमे, मेंः ब खर्क ज़ माजिपूतिए।] 45 फरी नखँए माचावल ओपारैनिकिन नोलाई ब च्मके। नो नखँए नर्गल ख्याव ओदोज्याव देखा बुरू अजम्बरी जुनील थूँद्यासो पसिन्या पाथ लिज्या। 46 [नर्गलाव रूइराए याभोगोन ब खर्क ज़ माखेमे, मेंः ब खर्क ज़ माजिपूतिए।] 47 हो मिताव ज़ नमीए माचावल ओपारैनिकिन, नो नमीलाई कोलाःद ख्याके। नो नमीए नर्गल ख्याव ओदोज्याव देखा बुरू परमेस्वरए ओराज्याल काना ताद पसिन्या पाथ लिज्या। 48 नर्गलाव रूइराए याभोगोन ब खर्क ज़ माखेमे, मेंः ब खर्क ज़ माजिपूतिए। 49“मिँ भरी प्राइँ ज़ मेंःनी सापी दार मिताव तान्या लेर। 50 सापी चाव ज़ लिज्या, खाली ओदार ओमालिकिन नोलाई कै जैद ची ओदार ल्यो जैन्या? है जैद जे ब सापी मिताव ताद जे जेल खैद लिच्यो,” है यादोक्यो।

10

ज्यालाई मारासन्या

(मत्ती १९:१-१२)

1 येसु ननी पुलुसद यर्दन भै होफताव यहूदिया खन्दल बाके। नल ब मिँर बनै माहोल्या ओल्योक याहुज्याव। येसुए पो पोक ओदोज्याव मिताव नोरालाई मनी परमेस्वरए ओपाँ ओरासथैज्याव। 2 नल फरिसीराए येसुलाई जाँचिन्याए जूनी ओल्योक हुद, “ज्यालाई रासो दैसिए सै मादैसिए?” है यादोक ते, 3 येसुए, “मोसाए ओकानुनल किताव सर्सिउ उलिज्याव?” है

ओरादोक ते, 4 नोराए, “मोसाए ओकानुननी ते रास्न्या कागत तोबो सर्किन रासो दैसिए,” है दोकेर। 5 येसुए फरी, “जेदिउदी ल्योर जेतावए ज़ मोसाए निताव कानुन सर्द ओयाचिउ। 6 भाःड स्त्रिस्तील परमेस्वरए मिँ ओजैक खेपा सोनो मेंमानी निजैक्यो। 7 है जैद ज़ खेपाए ओबाबु ओआमालाई रास्द ओज्यास सिप ताद, 8 नोनी तक्याँ ज़ ताज्यानी। हाःकिन नोनी नेब्लो माःक, तक्याँल गनिसिज्यानी। 9 है जैद जोनिलाई परमेस्वरए जोरैद निनैव, होनिलाई मिँराए ताराभाःरक,” है यादोक्यो।

10 फरी झिमल उसिसराए नो पाँए उजूनी फरी ब सुधिकेर। 11 है जैद येसुए, “जोए ओज्यालाई रास्द छुतलाई ओरैकिन नोए जारी येन ज़ दोक्यो। 12 हो मिताव ज़ जो मेंमाए ओरेलाई रास्द छुतस ओरेस्किन हो ब हिताव ज़,” है यादोक्यो।

येसुए ल्योक हुज्याव लुज़ार

(मत्ती १९:१३-१५; लूका १८:१५-१७)

13 नकिन नलाव मिँराए ज़िमज़ा याज़ारालाई ‘येसुए उकुइ नैद असिक घरायोक’ लिद ओल्योक यारारैकेर। नो रैज्यावरालाई उसिसराए सिडार्द यारारैकेर। 14 येसुए निताव रँःद उसिसरालाई जाँ रसिद, “नो ज़िमज़ा लुज़ारालाई तारारैक्यो, डाल्योदा हुव याराएचिके। परमेस्वरए ओराज्या नितावराए जूनी ज़ लिज्या। 15 डा साचो है डादाचिज्या, जोर आव लुज़ाराए माँःती परमेस्वरए ओराज्याल पसिन्या युँ मादोर, नोर खर्क ज़ पसिउ दैन्या मालेर,” है दाद, 16 नो लुज़ारालाई ओघोईल छींद याक्याँत उकुइ नैद असिक याएक्यो।

अजम्बरी जुनी खिमज़्याव धनी

(मत्ती १९:१६-२२; लूका १८:१८-२३)

17 येसु ननी पुलुसद येमत ओबाज्याक तोबो मिँ धोःहुद ओड़ाक

फुलुप्सिद, “अ धर्मी गुर्बा, डा अजम्बरी जुनी दैन्या किताव दान्या?” है ओदोक ते, 18 येसुए, “डालाई काराव धर्मी है नदाँज्याव? परमेस्वरकिन धर्मी सु ज़ माले। 19 धर्मसास्त्रलाव सर्सिउ दान्या मादान्या येन* नँ ज़ नसैँज्याखेहो — मिँ मासैःन्या, अर्काए ओज्याए ल्योदा माबान्या, माकुन्या, धुत गोहाई मायान्या, धुतैद माज्यान्या, बाबु आमाए ओमान नैद्यान्या,” है ओदोक ते, 20 नोए नो पाँर थैद, “गुर्बा, आव भरी ते ज़िमज़ाकिन दाहुव ज़ डानैज्या,” है ओदोक ते, 21 येसुए नोलाई रँःद मया दाद, “अझ तोबो नमासयोःताए। नँस लिज्याव भरी योःद काता ज़ माल्योरालाई भाःद याएकेदा, नँ स्वर्गताव धन दैन्या नले। नो येन भरी दाद नँ डाछींत हुन्के,” 22 है ओदोव भरी थैद ओडाः चुम चुमो जैद उयूर स्यासे सतेद ओल्द बाके। नोए ओधन सम्पती बनै कुधु ज़ ओल्योए मारास्धुक्यो।

येसुए उछींत बाज्यावर

(मती १९:२३-३०; लूका १८:२४-३०)

23 नो ओबावत येसु उसिसराए ल्योदा भाल्सिद, “धनी मिँ परमेस्वरए ओराज्याल पसिन्या बनै धो ताज्या,” है ओरादोक ते, 24 उसिसर नो पाँत बनै अचम्ब ताकेर। नकिन येसुए फरी, “साचो ज़ बाबुज़ार, परमेस्वरए ओराज्याल पसिन्या बनै धो ताज्या। 25 गपए उकुँल ऊँत उछिरिज्यावकिन धनी मिँ परमेस्वरए ओराज्याल पसिन्या झन धो ताज्या,” है ओरादोक ते, 26 नोर झन ज़ अचम्ब ताद, “इताव ताकिन ते सुए ची अजम्बरी जुनी ओदैधुरिज्याव?” है यादोक ते, 27 येसुए नोरालाई चिऊद, “मिँर यानी सु ज़ माबाँचिधुर, परमेस्वरनी वाज़ ताज्या। परमेस्वरनी मातान्या काता ज़ माले,” है यादोक्यो।

* 10:19 10:19 परमेस्वरए मोसालाई ओयो कानुन चिऊन्या — प्रस २०:१-१७; ब्य ५:६-२२।

28 हा:त ज़ पत्रुसए, “गे ते प्राईं ज़ ख्यानैद नछींत हुद गेले,” है ओदोक ते, 29 येसुए, “डा जेलाई साचो है डादाचिज़्या, जोए डाजूनी सोनो चाव थाए उजूनी ओएँ:र उज़िमर, ओदाज्यु भाइर, ओनाना बैनीर, ओबाबु ओआमार सोनो ओज़ार रास्द याख्यानैज़्याव, 30 होए आव उजिउत ज़ दुख दैज़्यावत ब एँ:र ज़िमर, दाज्यु भाइर, नाना बैनीर, आमार सोनो ज़ार सय दोबोर ब दैन्या ले। फरिकाव जुनील अजम्बरी जुनी ब दैन्या ले। 31 खाली ख्वा ख्वा डातावर छींत तारिज़्यार, छींतावर डात तारिज़्यार।”†

येसु फरी उसिन्याए जूनी ओपाँव

(मत्ती २०:१७-१९; लूका १८:३१-३४)

32 नकिन येसु उसिसरास यरूसलेमदा याबाज़्याक ओल डात ओबाज़्याव। उसिसर अचम्ब ताद यालिज़्याव, उछीं उछीं हुज़्यावर फरी छेन्द यालिज़्याव। येसुए बाह जना उसिसरालाई अछतड लाँद ओललाई छीनी तान्या पाँ भरी है यादोक्यो — 33 “गे यरूसलेमदा गेपुलुसनाज़्या। नल गेकेसोत डा मिँ मिन्सिउलाई मुख्या पुजारीर सोनो सास्त्रीराए याकुइत सूपिन्या लेर। नोराए डालाई सै:न्या ज़ थरैद रोमी सरकारए उकुइत याझा:नावत, 34 नोराए फरी डालाई उल्ली गिल्ली दाद, तिल्द, यारी:नावत सै:न्या लेर। हैदी ब सोलात सिउनी सैसिद सोन्या डाले,” है यादोक्यो।

याकूब सोनो यूहन्नानी निपाँ

(मत्ती २०:२०-२८)

35 नकिन जब्दियाए ओज़ानी याकूब सोनो यूहन्नानी येसुए ल्योक हुद, “गुर्बा, नँस जो गिन्निज़्या हो ज़ नयासिने सै है गिन्लिज़्या,” है निदोक ते, 36 येसुए, “डा जिनजूनी काता दाद्यान्या जिन्पैज़्याव?” है उनिदोक ते, 37 नोनी फरी, “स्वर्गत नँस तोबो नवोर्दा, तोबो

† 10:31 10:31 मत्ती १९:३० चिऊन्या।

नदाब्र्यादा चुसिउ गिन्दैक,” है दोकिनी। ³⁸ येसुए फरी, “जिन आव जिन्निज्ञ्यावए जूनी जिनमासैए। डा जाँवाक धो सहिउ दुखर डासहिरिज्ञ्या। जिन जिनमासहिधुरिज्ञ्या नी? रीए ओरागदैज्ञ्याव मिताव, डा ब दुखल डागदिरिज्ञ्या। जिन जिनमागदिधुरिज्ञ्या नी?” है अनिदोक ते, ³⁹ “गिन्धुया ज्ञ,” है दोकिनी। हाःत ज्ञ येसुए, “हैज्ञ, डा डादैरिज्ञ्याव धो सहिउ दुखर जिन मनी दैन्या ज्ञ जिन्ले, दुखल डागदिज्ञ्याव मिताव जिन ब गदिन्या जिन्ले। ⁴⁰ खाली डावोर्दा डादाब्र्यादा चुसिउ यान्या ते डा डाकुइत माले। निताव दैन्या जोलाई यासिउ लिज्ञ्या, होए उजूनी वाज्ञ लिज्ञ्या,” है निदोक्यो।

⁴¹उपुर्काव दस जना उसिसराए नो पाँ थैद याकूब सोनो यूहननानिलाई रँःद यारिस चोके। ⁴² नाःत ज्ञ येसुए उसिस भरिरालाई ओल्योदा खुल्द, “जे ज्ञ जेसैज्ञ्याखेहो, आव मानुवाताव घेप्पा है यारादोज्ञ्यावर याधूँलावराए डैत बनै अखत्यासोर ताद हाप हाप ख्याज्ञ्यार। ⁴³ जे जेल ते निताव जैसिन्या माताए। खाली जे ते जो सेर जैसिउ जेपैज्ञ्या, हो प्राइँए यासेवा दान्या ओजैसिक। ⁴⁴ सोनो जेनी जो घेप्पा जैसिउ जेपैज्ञ्या, हो प्राइँए याबाँदा ओजैसिक। ⁴⁵ डा मिँ मिन्सिउ ब ‘डासेवा घदोरक’ लिद डाहुव माःक, कुधुलाई बाँचैन्याए जूनी डाजिउ झाःद यासेवा डादोहुव ची,” है यादोक्यो।

येसुए उमी मारैःवलाई रँःधुन्या ओजैव

(मती २०:२९-३४; लूका १८:३५-४३)

⁴⁶नकिन येसु उसिसरास यरीहो सहरल बाकेर। छीनी ते बनै माहोल्यारास ननी पुलुसूद याबाज्ञ्याक तोबो तिमैए ओजा बारतिमै उमी मारैःव निद डासिज्ञ्याव येमक चुसिद उलिज्ञ्याव। ⁴⁷ नोए ‘नासरतलाव येसु हुज्ञ्या दी’ लिन्या थैद बनै चोइस, “अ दाऊदए ओथोलाव येसु, डालाई नयुँ ओनाक,” है लिद उकिज्ञ्याक, ⁴⁸ नो माहोल्याराए, “इयाउँ तालिनी,” लिद सिडार्केर। नोए झन ज्ञ चोइस

क्रिद, “अ दाऊदए ओथोलाव, डालाई नयुँ ओनाक,” है उलिक ते, 49 येसु नक च्याँ:सिद, “नोलाई आदा रैचिके,” है ओरादोक ते, नो माहोल्याराए नो उमी मारै:वलाई, “नयुँ सुहुपद च्याँ:सिन्के, प्रभुए खुल्निज्याव,” है यादोव प्राइँना ज़, 50 नो मिँ ओकाँ:बुलर ह्या ह्यी ख्याद थर च्याँ:सिद येसुए ल्योक बाके। 51 हा:त ज़ येसुए, “डा नजूनी काता दाद्यान्या?” है ओदोक ते, नो उमी मारै:वए, “गुर्बा, डा रँ:धुन्या डाताक,” है ओदोक ते, 52 येसुए, “बान्के, नयुँ उहुबोए ज़ नगराँके,” है ओदोव प्राइँना नो मिँ रँ:धुन्या ताद येमत येसुए उछीँ उछीँ ज़ बाके।

11

येसुलाई परमेस्वरए उमिनताव राजा याजैव

(मती २१:१-११; लूका १९:२८-४०; यूहन्ना १२:१२-१९)

1 येसु उसिसरास यरूसलेम छचोकाव जैतून दाँदाकिन जाँ होकसैकाव बेथफागे सोनो बेथानिया नाखार याकेसनावत येसुए नेब्लो उसिसनिलाई अइ लिद ड़ादा निपरींक्यो, 2 “जिन आव गेड़ाकाव नाखारल बाचिन्केदा, नल जिन्पसिउ प्राइँना तोबो आ:पै सुए ज़ यामाचेप्ताव बछेरा दैन्या जिन्ले। नोलाई पला:द रैचिन्के। 3 सुवाराए, ‘काराव पला:द जिन्लाँज्याव?’ है यादाचिन्किन, ‘गिनप्रभुलाई चाहिज्या, बेहार ज़ फकैद याचिवा दी,’ है यारादोचिन,” है दाद, नोनिलाई निपरींक्यो। 4 है जैद नोनी नाखारल बाद येसुए है उनिदोव मिताव ज़ बछेरालाई येमक, झिम ड़ाकाव साँबिलाक सुर्सिउ दैकिनी। नोलाई निपला:ज्याक ज़, 5 नकाव च्याँ:सिद लिज्यावराए, “काराव पला:द जिन्लाँज्याव?” है यारादोक ते, 6 नोनी येसुए उनिपैव मिताव ज़ है निरादोक ते भै:द याराएकेर।

7 है जैद नोनी नो बछेरालाई येसुए ल्योक लाँद याक्वार ओतर्त याझा:वत येसुए नोलाई चेपक्यो। 8 नकाव लिज्याव मिँराए

याकवार येमल तैदिकेर। ख्वाराए फरी पाखाजीलाव स्यावलार फूइँद तैदिकेर। ⁹ नो माहोल्यार ख्वार येसुए ओङ्गात, ख्वार उछीँत जैसिद अइ लिद किए किए बाकेर,

“होसन्ना! परमेस्वरए उमिनत हुव राजा धन्याकाव ओताक।

¹⁰गेपुर्खा दाऊद राजाए उमिनत हुव राज्या जय जय ओताक, स्वर्गताव परमेस्वरए उमिन बनै ओघ्योःक।”

¹¹है जैद नोर यरूसलेमल याकेसोत येसु ध्यान झिमल पसिद आदा होदा प्राइँदा चिऊद जाँ कुबिला ओतावए ननी पुलुसूद बाह जना उसिसरास बेथानियादा बासिनाकेर।

ओसै माल्यो नेभारा सीं

(मत्ती २१:१८-१९)

¹²हो पराःती बेथानियानी पुलुसूद याबाजूयाक येसु ओकरेक, ¹³जाँ होकसै ओख्यार लपलपौ नेभारा सीं तोबो रँःद ‘ओसैर ले सै’ लिद उचिऊनाक ओसै तोबो ब मादैक्यो। सैन्या बेला ओमातातावए ओख्या वाज उलिजूयाव। ¹⁴निताव रँःद येसुए नो सींलाई, “आकिनी नसै सुए ज्ञ ज्ञयाव तादैरक,” है ओदोज्ञयाव उसिसराए थैकेर।

येसुए बेपारीरालाई ध्यान झिमनी ओरापलेःव

(मत्ती २१:१२-१७; लूका १९:४५-४८; यूहनना २:१३-२२)

¹⁵हाःत ज्ञ येसु उसिसरास यरूसलेमल केस्केर। ओल ध्यान झिमल पसिद नलाव लँःजूयावर योःजूयावरालाई पलेःद, पैसा त्तोज्ञयावराए यातेबलर पलूतैद्याद, कुइतम योःजूयावराए याकुर्चीर ब ख्याद्याद, ¹⁶सुलाई ज्ञ यासमानरास ध्यान झिमलाव घ्यौँ आदा होदा बाव मायाद, ¹⁷येसुए नोरालाई, “धर्मसास्त्रल परमेस्वरए ओपाँ इताव सर्सिउ ओमालिजूयाव रो?

‘डा डाझिम प्राइँ जातलाव मिँराए जूँनी

पोंखारिन्या झिम जैसिउ लिज्या।’

जे ते झन आवलाई चोरराए पुप मिताव जैद जेने,” है लिद यासथैक्यो।

18नो पाँ नलाव मुख्या पुजारीर सोनो सास्त्रीराए थैद यारिस चोद, ‘आवलाई कै जैद गेसै:के?’ लिद निउँ खिम्केर। खाली माहोल्या भरी येसुए ओपाँत बनै अचम्ब ताद यालिज्यावए नो सै:व पैज्यावर येसुलाई रँ:द याछे:ज्याव।

19रिमदा रिमदा येसु उसिसरास सहरनी पुलुसद बाकेर।

युँ सुहुपद पोंखारिन्या

(मत्ती २१:२०-२२)

20हो परा:ती छकाल्न्या येसु उसिसरास नो नेभारा सीं लिज्याव येमलाव घ्याँ याबाज्याक नो सीं ओजरानी थँद उलिज्याव रँ:केर। 21 पत्रुसए नो डादाडाव चेतैद, “गुर्बा चिऊसाँकी, सराप नयो नेभारा सीं ते उथँव ची ओल्यो,” है ओदोक ते, 22 येसुए उसिसरालाई, “परमेस्वरए ल्योदा जेयुँ उहुपूक। 23 डा जेलाई साचो है डादाचिज्या, जोए उयुँ आदा होदा माजैद, ‘जुनी ब डादैया ज़’ लिद उयुँ उहुपूकिन, तोबो हाँलाई, ‘नँ नतिन भोसूद समुन्द्रल ख्यासिन्के,’ है ओदोकिन, नो हैज तान्या ले। 24 है जैद डा जेलाई है डादाचिज्या, जोत जेयुँ हुपूद ‘डादैया ज़’ है लिद जेपोंखारिकिन नो दैन्या ज़ जेले। 25 परमेस्वरलाई जेपोंखारिन्या बेलाक सुवारास माखैव काता पाँर जेयुँल जेनैकिन, डादा होलाई रासूद बल्ल पोंखारिच्यो। हो ताकिन ची स्वर्गताव जेबाबुए जेलाई मनी जेदोव पाप भरी रासून्या ले। 26 [फरी नो मिँलाई रासो जेमाभै:किन स्वर्गताव जेबाबुए जेलाई ब रासून्या माले,] है यादोक्यो।

येसुए ओहक सोनो यूहननाए ओहक

(मत्ती २१:२३-२७; लूका २०:१-८)

27 येशु उसिसरास फरी यरूसलेमल बाद ध्यान झिमल यालिज्ञ्याक नलाव मुख्या पुजारीर, सास्त्रीर सोनो यहूदीराए यासेरर येशुए ल्योक हुद, 28 “आव नदोज्याव येनर नँलाई सुए है उदींव, सुए हक उईव?” है यादोक ते, 29 येशुए, “डा ब जेलाई तोबो है डादाचिदा, नोए ओजवाप जेयाँकिन डा ब आव येन दान्या हक सुए ओयाँव है डादाचिया,” है दाद, 30 “रील सछैँज्याव यूहन्नाए ओयेन परमेस्वरए ल्योनी ताव सैं मिँराए ल्योनी ताव? है दाँचिके,” है ओरादोक ते, 31 नोर या याल, “ ‘यूहन्नाए ओयेन परमेस्वरनी ताव’ है गेद्या गेलिकिन, ‘हुकी काराव यूहन्नाए ओपाँ जेमाभैःव?’ है दान्या ले। 32 फरी ‘मिँनी’ है गेद्या गेलिकिन मिँराए ल्योनी ओछ्यास लिज्ञ्या,” है लिकेर। मिँ भरिए यूहन्नालाई अगमबक्ता ज्ञ है लिद थरैद यानैज्ञ्यावए छेःद नै यालिज्ञ्याव। 33 है जैद नोराए येशुलाई, “गेमासैँए,” है दोकेर। हाःत ज्ञ येशुए मनी, “हो ची ताकिन्दा डालाई आव येन दान्या हक सुए ओयाँव डा ब है डामादाच्यो,” है यादोक्यो।

12

अधिया कमैज्ञ्यावराए घर्ती

(मत्ती २१:३३-४६; लूका २०:९-१९)

1 येशुए घर्ती झाःद अइ लिद यासथैक्यो, “तोबो मिँए ओएँः भरिल जोम्परसै झाःद, प्राईनी भार्नाए धिरिद, खादर घोद जोम्परसै पीन्या कोलो तोबो झाःद, मिँ लिन्या खोपोरा ब तोबो जैद, नो एँःलाई अधियाल याद, ओल तोबो तादा देसड लिनाके दी। 2 नलाव जोम्परसैर किन्या बेला ओतावत तोबो ओयेन दाज्ञ्यावलाई उजुँ भरी चानाव परीक्यो दी। 3 नो अधिया कमैज्ञ्यावराए झन नोलाई क्योःद प्रोद रितो ज्ञ खेपैकेर दी। 4 फरी छीनी छुत ओयेन दाज्ञ्यावलाई उपरीक नोलाई मनी ओडै पाःद्याद बीज्ञ्यात जैकेर दी।

5 छीनी फरी तोबोलाई उपरीक नोलाई ते झन सैःकेर दी। हिताव ज़ छुत ओरापरींवर ब ख्वारालाई याराप्पोकेर दी, ख्वारालाई यारासैःकेर दी।

6“ओमापरींव जम्मा तोबो बनै उयुंलाव ओज़ा वाज़ रहिके दी। है जैद एँःए ओर्गेए, ‘आवलाई ताकिन ओमान नैदिर सैं’ लिद प्राइँरानी छीनी नो ओज़ालाई ब परीक्यो दी। 7 खाली नो ओज़ा उहुज़्याव रँःद नो अधिया कमैज़्यावर झन या या पाँसिद, ‘आव ते एँः दैन्या मिं ची, आवलाई गेसैःकिन आव एँः गेमीं ज़ तान्या ले,’ लिद, 8 नोलाई क्योःद सैःद पाखाड ख्याकेर दी।”

9नकिन येसुए नो मुख्या पुजारीर सोनो सास्त्रीरालाई, “नो एँःए ओर्गेए अधिया कमैज़्यावरालाई कै याजैवके लिक ते, नोर प्राइँलाई ज़ सैःद नो एँः छुतरालाई यान्या ले,” है दाद, 10 येसुए नोरालाई फरी, “जे आव धर्मसास्त्रलाव पाँ जेपरिखेहो,

‘भुलीराए कानूल ज़ माज़्यासे लिद याख्याव लुँ नो ज़ झन भुयॉरलाव लुँ ताके।

11 आव ओल परमेस्वरनी ताव पाँर ज़, इताव रँःद गे अचम्ब गेताज़्या।”

12नकिन नो मुख्या पुजारीर सोनो सास्त्रीराए ‘आव घर्ती ते गेडैत ज़ झाःद्यासिक्यो’ लिन्या सैँद येसुलाई क्योःव पैँकेर। खाली ओलस लिज़्याव माहोल्यारालाई रँःद छेःकेर। है जैद कैज़ माजैद अइज़ बाकेर।

माहाराजालाई सिर्मा यान्या सैं मायान्या
(मत्ती २२:१५-२२; लूका २०:२०-२६)

13नोराए छीनी येसुए ओपाँ क्योःद्यान्याए जूनी फरिसीर सोनो हेरोद राजासकावरालाई येसुए ल्योक यारापरीँकेर। 14 नोर ओल्योक बाद, “गुर्बा, नँ गेस नपाँज़्याव भरी साचो वाज़ लिज़्या। परमेस्वरए

ल्योदा बान्या येम ब साचोस नपैसिज्या। मिं रँद ब नमादोए, सुए ल्योदा ब नमाजैसिए। है जैद गेलाई तोबो पाँ है दाव ताके, माहाराजालाई गे सिर्मा यान्या सैं मायान्या? 15 किताव दान्या?” है यादोक ते, येसुए नोराए याकप्टें सैंद, “डालाई काराव जेजाँचिनाजूयाव? पैसा तोबो रैद्याँचिकेदा, डाचिऊरिजूया,” है ओरादोक ते, 16 नोराए पैसा तोबो रैद याएक ते, येसुए, “आत सुए उसुरूप, सुए उमिन उलिजूयाव?” है ओरादोक ते, “माहाराजाए उमीं ज़,” है दोकेर। 17 “हो ची ताकिन्दा माहाराजाए उमीं भरी माहाराजालाई ज़ एच्यो, परमेस्वरए उमीं भरी परमेस्वरलाई ज़ एच्यो,” है ओरादोक ते, नोर नो पाँत बनै अचम्ब ताकेर।

सदुकीराए यापाँ

(मत्ती २२:२३-३३; लूका २०:२७-४०)

18नकिन ख्वा सदुकीर ब येसुए ल्योक पजैना हुकेर। सदुकी है यारादोज्यावराए ‘सिउकिन सैसिन्या माताए’ है यालिजूयाव। 19 है जैद नोराए, “गुर्बा, मोसाए ओकानुनल तोबो अइ लिद सर्सिउ लिजूया, ‘तोबोए ज्या दाद ज़ार मादैद उसिकिन, ओभाइए ओदाज्युए ओथोर माफ्यान्याए जूनी ओमारूमलाई ओरैवक।’ 20 है जैद तोबोए ओज़ार सात भाइ याल्यो। यादाज्युए ज्या दाद ज़ार मादैद ज़ सिके। 21 होए उधूँलावए फरी नो ओमारूमलाई रैद नो मनी ज़ार मादैद ज़ सिके। नकिन साइँला मनी हिताव ज़ ताके। 22 नितावनी ज़ सात भाइ भरिए ज़ नो मेंमालाई रैद ज़ार मादैद ज़ सिकेर। प्राइँरानी छीनी नो मेंमा ब सिके। 23 है जैद नो मेंमा सात भाइए याजूया ओतावए अजम्बरी जुनील काताकावए याजूया तान्या?” है लिकेर।

24हा:त ज़ येसुए, “जे धर्मसास्त्रलाव पाँ मातीद परमेस्वरए ओसक्ती ब जेमाथरैधुवए ज़ चबनै बिरैद जेनै। 25 सिउनी सैसिद स्वर्गत बावर

ते सुए ज़ ज़्या ब मादोर, रे ब मादोर। प्राईं ज़ स्वर्गताव चाकर्या स्यासोर ताज़यार। ²⁶ फरी जे 'सिउकिन सैसिन्या माताए' है ल्यो पैज़्यावर धर्मसास्त्रलाव मोसाए ओसरोल झोपोरा ओचाँ:ज़्याव जेमापरिए रो? नो चाँ:ज़्यावनी परमेस्वरए ओपाँ अइ लिद हुके, 'डा अब्राहामए ओपरमेस्वर, इसहाकए ओपरमेस्वर सोनो याकूबए ओपरमेस्वर ज़।'

²⁷ओल ते मोरोराए यापरमेस्वर मा:क, जींदोराए यापरमेस्वर ची। है जैद जे चबनै बिरेद जेनै," है यादोक्त्यो।

प्राइरानी दान्या येन

(मत्ती २२:३४-४०; १०:२५-२८)

²⁸येसु सदुकीरास याखर्लेसिज़्याव तोबो सास्त्रीए थैद, 'येसुए थिक जवाप याएक्त्यो' लिद येसुए ल्योक बाद, "गुर्बा, मिँए दान्या मादान्या येन भरिनी प्राइरानी दान्या काताकाव उलिज़्याव?" है ओदोक ते, ²⁹ येसुए, "सर्सिउ भरिनी प्राइरानी दान्या आव ज़, 'अ इस्राएलीर थैचिके, जेप्रभु परमेस्वर तोबोका तोबो वाज़ लिज़्या। ³⁰ जेयुँलाई आदा होदा मादुलैद, जेर्सा मामोंद, जेप्रभु परमेस्वरए ल्योदा युँ थू जैद ओललाई वाज़ मया दान्या।' ³¹ होए उछींताव दान्या येन फरी आव ज़, 'जेक्याँलाई किताव जेसमारिज़्या, छुतलाई ब हिताव ज़ समारिन्या।' आव नेब्लोकिन घेप्पा काता ज़ माले," है ओदोक ते, ³² नो सास्त्रीए, "साचो ज़ है नलिके गुर्बा, परमेस्वर तोबोका तोबो ज़ लिज़्या, छुत माले। ³³ फरी नँ है नलिज़्याव मिताव युँलाई मादुलैद, सा मामोंद, परमेस्वरए ल्योदा युँ थू जैद ओललाई वाज़ मया दान्या, सोनो छुतलाई समारिन्या बनै ओचाहित ल्यो ज़ लिज़्या। निताव येन दान्या में:नी चरै:न्या पुजा सोनो पाथा पल्द चरै:न्या पुजाकिन घेप्पा लिज़्या," है ओदोक ते,

34 येसुए नोए ना: सैंद ओपाँव थैद, “नँ परमेस्वरए ओराज्याकिन तादाङ नमाले,” है दोक्यो। हा:किन सुए ज़ येसुस पाँन्या आँत मादोकेर।

स्त्रीस दाऊद राजाए ओप्रभु ज़

(मत्ती २२:४१-४६; लूका २०:४१-४४)

35 येसुए ध्यान झिमल लिज़्यावरालाई अइ लिद यासथैक्यो, “सास्त्रीराए ‘स्त्रीस दाऊदए ओथोलाव’ कातानी है यालिज़्याव?

36 ओल दाऊदए मनी छैंव पुरूसनी अइ लिद पाँद ले, ‘परमेस्वरए डाप्रभुलाई,

‘नसुतुररालाई नखँ धूँल झा:द डामाईवा पै, डावोर्दा चुसिद लिनके,’ है दोक्यो।’

37 है जैद ओल दाऊदए मनी स्त्रीसलाई ‘डाप्रभु ज़’ है ओदोकिन नो कै जैद होए ओथोलाव ओताज़्याव?” है यादोक्यो। माहोल्याराए येसुए निताव ओपाँ बनै थै थै डम्सिउ याथरैज़्याव।

येसुए सास्त्रीराए यापाहा झा:द ओरायो

(मत्ती २३:१-३६; लूका २०:४५-४७)

38 येसुए ओपाँ ओरासथैज़्याक अइ लिद यासथैक्यो, “सास्त्रीराए यायेननी जोगोइसिद लिच्यो। नोर रेरे बेन्बेनो क्वा क्वाइसिद ‘प्राइँए धो घदासिरक’ लिन्या युँ दाद बजार जीदा दुलिरिज़्यार।

39 नोर फरी धर्मसास्त्र झिमराल, घ्यो:व घ्यो:व भत्यारल ब प्राइँए रँ:न्याक ओमान ल्यो पोल वाज़ चुसिउ पैज़्यार। 40 नो सास्त्रीराए झन राँदी मेंमारालाई तँनी छाम छुम याराख्याज़्यार, मिँराए डाक वाज़ बनै चाव चाव पोखारिउ जैसिज़्यार। नोराए ते प्राइँरानी घ्यो:व सजा ज़ दैरिज़्यार,” है लिद यासथैक्यो।

राँदी मेंमाए ओचरै:व भिती

(लूका २१:१-४)

41नल ध्यान झिमल येसुए भिती याचरैःजूयाव बाकस छचोक चुसिद मिराए भिती याचरैःजूयाव ओराचिऊजूयाव। धनी धनीराए बनै कुधु कुधु याझाःजूयाव। 42 नो बेलाक तोबो काता ज़ माल्यो राँदी मेंमा हुद नेब्लो पैसा चरैःक्यो। नो नेब्लो थोम्द तपैसावाकाव ओल्यो। 43 नो रेंःद येसुए उसिसरालाई ओल्योक खुल्द, “डा साचो है डादाचिजूया, आव काता ज़ माल्यो राँदी मेंमाए छुतराकिन कुधु चरैःक्यो। 44 धनीराए ते यासय़ेलोनी वाज़ चरैःकेर। नो राँदी मेंमाए ते ओललाई ओमाथैँजूयावत ब ओलस लिजूयाव भरी प्राईँ ज़ चरैःक्यो,” है यादोक्यो।

13

खेमन्या बेलाकाव सरेसर

(मत्ती २४:१-२८; लूका २१:५-२४)

1येसु ध्यान झिमनी पुलुस्द ओबाजूयाक तोबो उसिसए, “गुर्बा चिऊसाँकी, काता आः घ्योःव घ्योःव लुँर, आः चाव झिमर,” है ओदोक ते, 2 येसुए, “हैज़, आव भरी चिऊचिके। खाली छीनी तछा आव भरी तैःद लुँए तर्त लुँ ब रहिन्या माले,” है यादोक्यो।

3नकिन जाँवाक येसु ध्यान झिम होफताव जैतून दाँदात चुसिद उलिजूयाक पत्रुस, याकूब, यूहन्ना सोनो अनद्रियासराए अलगज़ा येसुलाई, 4 “आव नपाँ भरी खर्क ओतारिजूयाव? नोर तान्या सरेस किताव ओतारिजूयाव? गेलाई है दासिके,” है यादोक ते, 5 येसुए, “जेलाई सुवाराए झुकैचिर्या, जे सैसिद जोगोइसिद लिच्यो। 6 मिर डा डामिन कुद ‘डा ज़ ख्रीस’ है लिद कुधु ज़ हुद कुधुलाई ज़ याराझुकैरिजूयार। 7 सोनो ‘आड लरैँ ताजूया, होड लरैँ ताजूया’ है यालिजूयाव जेथैक जे ताछेच्यो। आव भरी जुनी ब ताव ज़ परिए, खाली नो खेमन्या बेला माःक। 8 नोकिन डादा जात जात, राज्या राज्या लरैँ दान्या लेर। पो पोल भोंचालोर अनिकालर ब तारिजूया। आव भरी मेंमाए ज़ा दैन्या बेलाक ओघर्लिजूयाव मिताव सुरूलाव

दुख वाज्ज लिज्या।

9“जे फरी सैसिद लिच्यो। हो बेलाक जेलाई मनी अदालतदा लाँद सँपिचिरिज्यार, धर्मसास्त्र झिम झिमल जेलाई प्रोचिरिज्यार। डा डाजुनी हाकिमर राजाराए डाक सच्याँद खोलेःचिरिज्यार। ननी ज़ जे नोरालाई डासाची यान्या जेले। 10 खेमन्या बेला ओमाताद डादा चाव था प्राईं जातलाव मिँराए खार्ल थासो ज़ परिके। 11 है जैद नोराए जेलाई क्योःद यासँपिचिक, ‘डा कै लिन्या, काता पाँन्या ओताव?’ लिद जेयुँ आँचा पाँचा ताजैच्यो। नो बेलाक जो हुज्या हो ज़ पाँच्यो। नो पाँज्याव जे माःक, परमेस्वरए छैँव उपुरूस जेस लिद ओल ज़ पाँन्या ले। 12 हो बेलाक ओभाइए ओदाज्युलाई, ओबाबुए ओज़ालाई सैःन्या सजाल यारापारैरिज्यार। याज़ाराए याबाबु याआमाकिन तँदा जैसिद सैःन्या सजाल यारापारैरिज्यार। 13 जे डामिनतावर जेतावए जेलाई प्राईंए सोन्या लेर। खाली जो आव दुखर ओमाखेमा पै थ०रिज्या, होए ज़ अजम्बरी जुनी दैन्या ले।

14“आव ब सैच्यो, नो भाःकिनकाव सर्सिउ मिताव तोबो युँ माजामोए ध्यान झिमलाव चोखो पोल तोबो फुरी हुद नुल्पा नुल्मा ओजैहुव जेरैःक यहूदियाल लिज्यावर गों जीदा ओधोःरक। 15 थालात लिज्यावर ब याझिमलाव याआल मालर ताचानारक। 16 एँःल लिज्यावर मनी याक्वार चाना याझिमदा ताबारक। 17 हो बेलाक याफूल याज़ा ल्योर सोनो नुईं सवैज्याव आमार युँ नावज़ार। 18 निताव दुख ज्युँःव साहाक ताताक लिद परमेस्वरलाई पोखारिच्यो। 19 हो बेलाकाव दुख बनै धो सहिउ तारिज्या। निताव दुख आव संसार परमेस्वरए ओजैवकिन आःपै माहुताए, निताव दुख नोकिन छींनी ब तान्या माले। 20 निताव बेला तावका ताव ज़ उलिकिन सु ज़ रहिन्या मालेर। खाली ओल परमेस्वरए छँतिद

ओरानैज़्याव उमींराए जूनी नो बेला सुतुईद्यान्या ले।
 21“नो बेलाक जेलाई सुवाराए, ‘ख्रीस आड हुद ले, होड हुद ले,’
 है यादाचिकिन नोरालाई तारापतिच्यो। 22 ख्वार डा डामिन कुद
 ख्रीस जैसिद हुन्या लेर, ख्वार परमेस्वरए उपुरूसनी पाँव जैसिद
 हुन्या लेर। नोराए अचम्ब अचम्बलाव सरेसर येनर जैद कुधुलाई
 झुकैन्या लेर। परमेस्वरए ओराछाँतिउरालाई मनी झुकैन्या छ्यास
 लिज्या। 23 है जैद जे सैसिद लिच्यो। आव पाँर जेलाई डादा ज़ है
 दाद डानैचिए।”

ख्रीस फरी उहुन्या छ्याम

(मत्ती २४:२९-३१; लूका २१:२५-२८)

24“हो बेलाकाव दुख ओखेमोत निमी ब चुम चुमो तारिज्या, स्यावैए
 ओज़गै ब मारिज्या। 25 सोरोर ब नमतिन तेरिज्यार, नमताव भरी ब
 यासतर माद थोनोःसिन्या लेर। 26 हाःत ज़ मिँ मिन्सिउलाई बनै ज़गै
 मगैव ओसक्तीरास बादल जींल उहुज्याव मिँ भरिराए रँःन्या लेर।
 27 हाःत ज़ स्वर्गताव ओचाकर्या भरी परीद नाम नमलाव काना
 कुनीड लिज्याव चार चौकालाव छाँतिद ओरानैज़्याव उमींरालाई
 ओल्योक यादुपरिज्याव।”

नेभारा सींए ओसरेस

(मत्ती २४:३२-३६; लूका २१:२९-३३)

28“नेभारा सींनी आव अर्थ ब सैच्यो, किताव सींर यामोम्नाक
 ‘उभ्याली उहुनाव ची ओल्यो’ है जेलिज्या, 29 हिताव ज़ नो
 है डादाचिउ पाँ भरी ओतानाज्याव जेरँःक ‘ख्रीस उहुन्या बेला
 ओतानाव ची ओल्यो’ लिन्त्या सैच्यो। 30 डा जेलाई साचो है
 डादाचिज्या, आव भरी ओमातावा पै आव जुक खेमन्या माले।
 31 आव नाम नम ते खेमन्या ले, डा डापाँ ते खर्क ज़ मान्या माले।”

13:24 13:24 यसै १३:१०; इज ३२:७; योए २:१०, ३१; ३:१५ 13:25 13:25 यसै ३४:४;
 योए २:१० 13:26 13:26 दान ७:१३

ख्रीस उहुन्या बेला सुए ज़ मासैर
(मत्ती २४:३६-४४)

32“खाली नो छचाम, नो बेला सुए ज़ मासैर। स्वर्गताव चाकर्याराए ब मासैर, परमेस्वरए ओज़ाए ब मासैव, स्वर्गताव डाबाबुए वाज़ सैज़्याव। 33 है जैद जे सैसिद लिच्यो। आव छचाम हरिज़्या लिन्या जे जेमासैए। 34 आव भरी तोबो तादा देसदा बाज़्याव मिँ स्यासो लिज़्या। उज़िम ओख्यानैज़्याव बेलाक ओलसकाव लिज़्याव भरी ओयेन दाज़्यावराए यापासल झा:द सु सु यायेन जैद्याद, ग्राम गुज़्याव पाल्यालाई, ‘सैसिद लिनी,’ है दाद बाज़्या। 35 है जैद जे ब सैसिद लिच्यो। जेघरपती हुन्या रिमक ताक्या, आधा रील ताक्या, भाल्या कोनादा ताक्या, नम उसँक ताक्या, जे जेमासैए। 36 सैसिद जेमालिकिन उमँ:जानी उहुक जेलाई डल्द जेलिज़्याव दैहुन्या ले। 37 है जैद जेलाई है डादाचिउ पाँ प्राइँलाई ज़ है डारादोज़्या — सैसिद लिच्यो।”

14

येसुलाई सै:न्या गुमुस्ता

(मत्ती २६:१-५; लूका २२:१-२; यूहनना ११:४७-५३)

1निस्तार यादोज़्याव माँदा भरेस ज़्यान्या पर्व नेलाए ओड़ाल उलिज़्याव। हो बेलाक ज़ मुख्या पुजारी सोनो सास्त्रीराए ‘येसुलाई कातानी झुकैद क्यो:द सै:न्या ओताव?’ लिद गुमुस्ता यादोज़्याव। 2 नोर, “पर्व बेलाक माता, सानी मिँर मचिन्या ओछ्यास लिज़्या,” है यालिज़्याव।

येसुए ओडैत मास थीव मेंमा

(मत्ती २६:६-१३; यूहनना १२:१-८)

3येसु बेथानिया नाखारल तोबो सिमोन यादोज़्याव कुरीए उज़िमक काँ उज़्युज़्याव। हो बेलाक तोबो मेंमाए बनै चाव जिम्ज़ा लुँ जाल

उसी डरो बनै ओएः ल्यो जतामसीए मास रैद जाए ओडै केःद येसुए ओडैत ओपोःस ज़ थीदिक्यो। 4 निताव रेंःद नक लिज़्यावर ख्वा ख्वाराए यायुं वा वा कैद, “आव मेंमाए काराव नाः ओएः ल्यो मास खेर ओझाःज़्याव? 5 बुरू नोलाई सोंसय चाँदीए सिक्काल योःद नो पैसाए काता ज़ माल्योरालाई भाःद ओराएकिन तान्या ओल्यो,” है लिद नो मेंमालाई सिडार्केर।

6 हाःत ज़ येसुए, “घदोज़्यावक, काराव उयुं केःद जेएज़्याव? नोए ते डाज़ूनी बनै चाव येन दोक्यो। 7 काता ज़ माल्योर ते जेस एकतार ज़ लिज़्यार। नोरालाई जो बेलाक जेराएदी ब ताए। डा ते जेस एकतार लिन्या डामाले। 8 आव मेंमाए उधुवा भरी दाद्यौक्यो। डा डामासिद ज़ गादैन्या छचामकावए जूनी डामोरोलाई डादा ज़ थीद ओयाँव मिताव ज़ ताके। 9 है जैद डा जेलाई साचो है डादाचिज़्या, संसार भरिल जोड जोड चाव था यारासथैज़्यार, होड होड आव मेंमाए ओदोव येन थासूद उमिन ब रहिन्या ले।”

येसुलाई धोका याज़्याव इस्करियोत

(मत्ती २६:१४-१६; लूका २२:३-६)

10 नकिन बाह्व जना उसिसरानी यहूदा इस्करियोतए येसुलाई मुख्या पुजारीराए याकुइत पारैन्याए जूनी याल्योक बाके। 11 नोर नोए ओपाँ थैद बनै रेंद नोलाई पैसा यान्या ब जैकेर। हाःकिन इस्करियोतए ‘येसुलाई कै जैद डासूंपिके?’ लिद मौका खिम्क्यो।

माँदा भरेस ज़यान्या पर्ब

(मत्ती २६:१७-१९; लूका २२:७-१३)

12 हाःत ज़ नो माँदा भरेस ज़यान्या पर्ब सुरू ओतावत पाथा पलन्या छचाम येसुए उसिसर ओल्योक हुद, “नँ कै नलिज़्या, आव पर्ब मानिन्याए जूनी ज़्यावर काङ्क जैनान्या?” है यादोक ते, 13 येसुए नेब्लो उसिसनिलाई, “जिन सहरल बाचिन्केदा, नल तोबो री गपूद

ओघागरी छींद बाजूयाव मिँ दैन्या जिन्ले। नोए उछीं उछीं बाद, 14 जोल पसिजूया होल ज़ पसिद नो झिमए ओर्गेलाई, 'नँलाई गेगुर्बाए है दींजूयाव, पाहुना लिन्या कुन्ती काङ्क उलिजूयाव? आव पर्व उसिसरास नल मानिरिजूयाव दी,' है दोचिन। 15 है जिन्दोव प्राइँना नोए ओतर्ताव तालल तोबो घेप्पा कुन्ती चावस सजैसिउ जिनलाई सतैँघान्या ले। गेजूयाव भरी नल ज़ जैचिन," है दाद निपरीक्यो। 16 है जैद नोनी ननी पुलुसुद सहरल बाद है अनिदोव मिताव ज़ दैद पर्वताव ज़याव भरी जैकिनी।

परमेस्वरए उमिनताव भत्तार

(मती २६:२०-३०; लूका २२:१४-२३; यूहन्ना १३:२१-३०; १ कोरिन्थी ११:२३-२५)

17 हो छचाम रिमक येसु बाह्व जना उसिसरास नो झिमल दुप्सिहुकेर। 18 नोर चुसिद ज़यावर याजूयुजूयाक येसुए, "डा जेलाई साचो है डादाचिजूया, जेनी तोबोए डालाई धोका यान्या ले, आख डास सिप ज़युजूयाव मिँ ज़," है ओरादोक ते, 19 उसिसर यारुँ माचाव दाद, "डा ते माताखेहो सा," है लिद पालास पालास है दोकेर। 20 हा:त ज़ येसुए, "बाह्व जना भरिनी जोए डास भरेस चिपल छोइद ज़युजूयाव, हो ज़। 21 डा मिँ मिन्सिउए ते धर्मसासत्रलाव सर्सिउ मिताव दुखर जुनी ब सयोव ज़ परिए, खाली डालाई धोका याजूयाव मिँलाई ते थैए माँतकन ज़ लिजूया। निताव मिँ बुरू ओमाजर्मिकिन तान्या ओल्यो," है यादोक्यो।

22 नकिन नो याजूयुजूयावत ज़ येसुए उकुइत भरेस तोबो रैद, असिक निद नो भरेसलाई के:द, "हाँ, आव ज़युचिके। आव डाक्याँ ज़," है दाद भा:द याएक्यो। 23 हो मिताव ज़ फरी खुरी उकुइत रैद धन्याबाद चरै:द नोरालाई याएक्यो। प्राइँए ननी याओवत, 24 येसुए, "आव जेओजूयाव कुधु मिँराए जूँनी डासोभोरिजूयाव डाझी ज़।

आनी ज़ परमेस्वरए जेस साःरो बाचा नैद्याचिरिजूयाव। ²⁵ डा साचो ज़ है डादाचिजूया, परमेस्वरए ओराजूयाल साःरोनी डामाओवा पै डा आव भत्यारलाव दाखमद्य आछिमकिन ओन्या डामाले,” है यादोक्यो। ²⁶ नकिन भजन तोबो गैद ननी पुलुस्द जैतून दाँदादा बाकेर।

पत्रुसए ओयेन येसुए डादा ज़ है ओदोव

(मत्ती २६:३१-३५; लूका २२:३१-३४; यूहन्ना १३:३६-३८)

²⁷नकिन येसुए उसिसरालाई, “जे डालाई प्राईए रासून्या जेले। धर्मसास्त्रल इताव सर्सिउ लिजूया, ‘बेधाराए यार्गे गावलालाई प्रोद डसैःवत, बेधार चितराँ पुतराँ तारिजूयार।’

²⁸हैदी ब सिउनी सैसिद जेडादा ज़ गालीलल डाबारिजूया,” है ओरादोक ते, ²⁹पत्रुसए, “प्रभु, उपुर्कावराए प्राईए यारासुनिदी ब डा ते नँलाई डामारासुनी,” है ओदोक ते, ³⁰येसुए, “डा नँलाई साचो है डादीजूया, आछिम रील भाल्या नेकराँ ओमाकोद ज़ डालाई सोंखेप, ‘डामासरेसे,’ है दान्या नले,” है ओदोक ते, ³¹पत्रुसए झन ज़, “माःक, डा नँस सिन्या ओतादी ब डा नँलाई डामासरेसे है लिन्या डामाले,” है दोक्यो। उपुर्कावराए मनी हैज़ लिकेर।

येसुए गेतसमनील ओपोंखारिउ

(मत्ती २६:३६-४६; लूका २२:३९-४६)

³²नकिन येसु उसिसरास गेतसमनी यादोजूयाव बगैचाल बाद उसिसरालाई, “डा डापोंखारिवा पै जे आक ज़ लिच्यो,” है दाद, ³³पत्रुस, याकूब सोनो यूहन्नारालाई ओलस यालाँक्यो। हाःत ज़ येसु उयुँर स्यासे सतेद धो थाइव तानाद, ³⁴नो सोम्लोरालाई, “डायुँर स्यासे तेद सिवा सिवा ताद डाले। जे आक ज़ लिद सैसिद लिचिके,” है दाद, ³⁵नोराकिन छ्यावा होकसै बाद

नामक फुलुप्सिद ओक्याँत हरिज्ञयाव दुखर भर्सकी ताहुक लिद, ³⁶ “अब्बा, बाबु, नँ नमादोधुव काता ज़ माले, आव डाक्याँत हरिज्ञयाव धो सहिउ दुखर वैघाँके। खाली डा डायुँ ते माःक, नँ नयुँ ओताकिन वाज़,” है लिद पोंखारिद, ³⁷ नो स्रोम्लोराए ल्योक उहुवत नोर इल्द यालिज्ञयाव दैहुद पत्रुसलाई, “सिमोन, नँ इल्द नलिज्ञयाव रो? नँ कै जैद ड़ास तघन्ता पै ब नमालिधुज्ञयाव? ³⁸ जे प्राइँ ज़ सैसिद पोंखारिचिके, मानी दुखराल जेमाथरिधुया। जेयुँए ते दान्या ज़ पैज्ञयाव, खाली पाखाताव जेक्याँए ते मासहिधुन्या ओछ्यास लिज्ञया,” है यादोक्यो।

³⁹नकिन येसु फरी ब इ़ादाडाव ओपोंखारिज्ञयाव पोक बाद हो मिताव ज़ पोंखारिद, ⁴⁰ नो स्रोम्लोराए ल्योक उहुक फरी ब इल्द यालिज्ञयाव ज़ यादैहुक्यो। नोराए यामीर बनै पातिद यामासहिधुवए यालाजए येसुस काता ज़ मापाँधुकेर।

⁴¹फरी तखेप छीनी ब नोरालाई इल्द यालिज्ञयाव ज़ दैहुद, “आःपै जेमीर मायोःताए रो? ताया, अब बेला योःके। डा मिँ मिन्सिउ पापीराए कुइत डासुँपिसिरिके। ⁴² च्याँःसिचिके, गेबा। ड़ालाई धोका याज्ञयाव मिँ नक ज़ हुद ले,” है यादोक्यो।

येसुलाई याक्योःहुव

(मत्ती २६:४७-५६; लूका २२:४७-५३; यूहनना १८:३-११)

⁴³येसु ओपाँज्ञयाक ज़ नो बाह्व जना उसिसरानिकाव यहूदा इस्करियोत बनै माहोल्या मिँरास तरवालीर खोंतार रैद हुकेर। नोर मुख्या पुजारीर, सास्त्रीर स्रोनो यहूदीराए यासेरराए ल्योनी हुद यालिज्ञयाव। ⁴⁴ नो इस्करियोतए इ़ादा ज़ नो क्योःना हुज्ञयावरालाई, “डा जोलाई माइँ डादोए, होलाई ज़ क्योःद लाँच्यो,” लिद सरस याद ओरानैज्ञयाव। ⁴⁵ है जैद बगैचाल याकेसो प्राइँना इस्करियोत येसुए ल्योक बाद, “जेरो गुर्बा,” लिद माइँ

दोक्त्यो। ⁴⁶ हाःत ज्ञ नो माहोल्याराए येसुलाई ताप तप क्योःकेर।
⁴⁷ नकाव च्याँःसिद लिज्याव तोबोए ओतरवाली हाइद प्रधान
 पुजारीए ओनोकोरलाई तँनिकाव ओर्ना पल्द सतेदिक्यो।
⁴⁸नकिन येसुए नो क्योःना हुव माहोल्यारालाई, “काराव डालाई
 दाँकालाई मिताव तरवालीर खोंतार दाद जेक्योःहुनाव? ⁴⁹ जेलाई
 दिनकाव ज्ञ ध्यान झिमल परमेस्वरए ओपाँ डासथैचिक
 जेमाक्योःनाके। खाली धर्मसास्त्रलाव सर्सिउ पाँ सयोःव ज्ञ
 परिके,” है ओरादोव प्राइँना, ⁵⁰ उसिस भरी येसुलाई रासूद चितराँ
 पुतराँ धोँःकेर। ⁵¹ हो बेलाक तोबो धापाजाकाव छोर्या नाडग्या
 ओक्याँत पालो क्वा वाज्ज भिरिसिउ उलिज्याव। होलाई मनी
 याक्योःव प्राइँना, ⁵² ओक्वार ख्यानैद नाडग्या ज्ञ धोँःके।

येसुलाई घ्योःव कचरील यालाँव

(मती २६:५७-६८; लूका २२:५४,६३-७१; यूहन्ना १८:१२-
 १४,१९-२४)

⁵³नकिन नो क्योःना हुवराए येसुलाई प्रधान पुजारीए ल्योक
 लाँकेर। नक मुख्या पुजारीर, यहूदीराए यासेरर सोनो सास्त्रीर
 दुप्सिद यालिज्याव। ⁵⁴ हो बेलाक पत्रुस जाँ तादाड याछीं याछीं
 हुद नो प्रधान पुजारीए ओचतराक ज्ञ हुद नलाव पाल्यारास चुसिद
 मेंः उमुइँसिज्याव।

⁵⁵नो झिमल मुख्या पुजारीर सोनो घ्योःव कचरीलाव सेर भरिए
 सैःन्या कर याखिमज्याव, कर ते कान्त ज्ञ मादैकेर। ⁵⁶ धुत गोहाई
 पाँन्यार कुधु ज्ञ यातावए सु सु यापाँ ब माखैके। ⁵⁷ बल्ल तोबो
 नेब्लो च्याँःसिद अनाकलाव पाँर पलेद अइ लिकेर, ⁵⁸ “आवए,
 ‘डा आव कुइए जैसिउ ध्यान झिमलाई तैःद फरी सोलात कुइए
 माजैसिउ ध्यान झिम डाजैरिज्या,’ है ओल्यो गे ज्ञ गेथैके,” है
 यादोक ब, ⁵⁹ नोराए यापाँ ब माखैके।

⁶⁰हाःत ज्ञ नो प्रधान पुजारी याखार्ल च्याँःसिद येसुलाई, “नँ नपाँ

काता ज़ ओमालिज़्याव रो? आवराए नडैत झाःद याईव पाँ किताव उलिज़्याव?” है ओदोक ते, ⁶¹ येसुए घाइ ज़ मादोक्यो। फरी नो प्रधान पुजारीए, “नँ माहान परमेस्वरए ओज़ा खीस सैं माःक?” है ओदोक ते, ⁶² येसुए, “डा साचो हो ज़। तछा डा मिँ मिन्सिउलाई माहान परमेस्वरए ओवोर्दा चुसिद डालिज़्याव ब रँःन्या जेले, सोनो स्वर्गतिन बादलरास डाहुज़्याव ब रँःन्या जेले,” है ओदोव प्राइँना ज़, ⁶³ प्रधान पुजारीए उरिसए ओक्वार चीए चीए, “छुत गोहाई काता ओचाहिउ? ⁶⁴ जे ज़ जेथैके, आवए परमेस्वरए उमिन ओबलेःज़्याव। जे कै जेलिज़्याव?” है ओरादोक ते, प्राइँए ज़ सैःन्या थरैद, ⁶⁵ ख्वाराए येसुलाई तिल्द, उमीर कपद्याद मुत्काए प्रोकेर। नै जैज़्यावराए फरी, “नँलाई प्रोज़्याव सु,” है लिद बरेकेर। सिपाईराए पाला येसुलाई प्रोए प्रोए लाँकेर।

पत्रुसए येसुलाई ‘डामासरेसे’ है ओरादोव

(मती २६:६९-७५; लूका २२:५६-६२; यूहन्ना १८:१५-१८, २५-२७)

⁶⁶पत्रुस मेल चतराक ज़ उलिज़्याव। नो बेलाक प्रधान पुजारीए ओय्रेन दाज़्याव तोबो मेंमा हुद, ⁶⁷पत्रुसलाई मेंः उमुईंसिज़्याव रँःद, नोलाई लँ लँ चिऊद, “नँ मनी नासरतलाव येसुस नल्यो सानी,” है ओदोक ते, ⁶⁸पत्रुस माभैःद, “नँ काता नपाँज़्याव इताव, डा ते काता ज़ डामासैए,” है दाद ननी पुलुस्द साँबिलाक बाके। हो प्राइँना ज़ भाल्या कोके। ⁶⁹नकिन जाँ छ्यावाक नो मेंमाए फरी पत्रुसलाई रँःद नक लिज़्यावरालाई, “आव ते साचो होसकाव ज़ ओल्यो,” है ओरादोक ते, ⁷⁰पत्रुस फरी ब माभैःके। फरी छ्यावाक नक लिज़्यावराए, “नँ ब साचो उसिसरासकाव ज़, नँ ते गालीललाव ज़ ची,” है यादोक ते, ⁷¹पत्रुस बनै थल्सिद किर्या झाःद, “नो है जेलिज़्याव मिँलाई सरेस ज़ डामासरेसे,” है ओरादोव प्राइँना ज़,

72 भाल्या नेकराँ कोके। नाःत ज़ डादा येसुए पत्रुसलाई, “भाल्या नेकराँ ओमाकोद ज़ स्रोखेप डालाई, ‘डामासरेसे’ है लिन्या नले,” है ओदोव पाँ ब चेतैक्यो। नो चेतैद पत्रुस बनै घर्के।

15

रोमी सरकारलाव पिलातस

(मत्ती २७:१-२, ११-१४; लूका २३:१-५; यूहनना १८:२८-३८)

1 छकाल्न्या घग ज़ मुख्या पुजारीर, यहूदीराए यासेरर, सासत्रीर सोनो घ्योःव कचरीलाव भरी यासल्ला खैद येसुलाई किद पिलातसए ल्योक लाँद सँपिकेर। 2 है जैद पिलातसए येसुलाई, “नँ साचो यहूदीराए याराजा ज़ रो?” है ओदोक ते, येसुए, “नँ ज़ नथरैनाके सानी,” है दोक्यो। 3 नाःत ज़ मुख्या पुजारीराए येसुलाई कुधु ज़ खतर लैकेर। 4 पिलातसए, “काराव घाइ नमालिज्याव? नाः कुधु पाँर नडैत झाःद याईज्याव नमाथैए रो?” है ओदोक ब, 5 येसु ज़न ज़ तोबो ब मापाँके। निताव रँःद पिलातस अचम्ब ताके।

येसुलाई रासो यामाभैःव

(मत्ती २७:१५-२६; लूका २३:१३-२५; यूहनना १८:३९-१९:१६)

6 पिलातसए ओपालाक सालकाव तखेप निस्तार पर्वत यहूदीराए जो कैदीलाई ‘रासद्यासिके’ है लिज्यार, होलाई ज़ रासद ओराएज्याव। 7 हो बेलाक तोबो बारब्बा यादोज्याव ओनैरास इयालखानाल यालिज्याव। नोर सरकारकिन तँदा जैसिद मिँरालाई मचैद तोबो नेबूलोलाई सैःद यारानैज्याव। 8 है जैद माहोल्याराए पिलातसए ल्योक बाद, “सालकाव तखेप तोबो कैदीलाई रासद नयासिज्याव मिताव आथ पाला ब तोबोलाई रासद्याव ताके,” है यादोक ते, 9 पिलातसए, “हुकी यहूदीराए याराजालाई रासद डयाच्यो रो?” है यादोक्यो। 10 ओल पिलातसए ते ‘आवराए येसुलाई अनाकल ज़ यामी तूद सँपिद नैनार’ लिन्या सैद ओनैज्याव। 11 मुख्या पुजारीराए ज़न मिँरालाई मचैद, “माःक, नो

बारब्बालाई रासूद्यासिके,” है दाव यारापरींकेर। 12 नो पाँ थैद पिलातसए फरी, “हुकी नो यहूदीराए याराजा जेदोज्ञयावलाई डा कै जैन्या की?” है ओरादोक ते, 13 नोर, “क्रुसत तङ्गैद सैःन्या,” है लिद किकेर। 14 पिलातसए फरी, “काराव? आवए मादान्या काता दाद औनैज्ञयाव?” है ओरादोक ते, नोर ज्ञन ज़ मचिद, “क्रुसत तङ्गैद सैःन्या,” है लिद बनै ज़ किकेर। 15 है जैद पिलातसए माहोल्यारालाई सभैःन्याए जूनी बारब्बालाई रासूद्याद येसुलाई रीःद, क्रुसत तङ्गैद सैःन्याए जूनी सिपाईरालाई ज़ यासूंपिक्यो।

येसुलाई यागिल्लैव

(मत्ती २७:२७-३१; यूहन्ना १९:२-३)

16 हाःत ज़ सिपाईराए येसुलाई प्रेतोरियन यादोज्ञयाव दरबार जील लाँद रोमी पलतन भरी यारादुपूकेर। 17 नोराए येसुलाई घ्यामर्यासो क्वा जासूद, जुए मुकुत रूंद ओडैत जासूद, 18 “ए यहूदीराए याराजा, जय जय ओताक,” है लिद बरेःद, 19 ओडैत भाताए प्रोद्याद, तिल्लद, ओङ्गाक याघूँदानी फुलुप्सिद धो दाद ओमान नैद्याव मिताव जैसिकेर। 20 गिल्लैद गिल्लैद चिम यादोवत नो घ्यामर्यासो क्वा सिउःद्याद, डादाडाव ओक्वार जासूद क्रुसत तङ्गैना लाँकेर।

येसुलाई क्रुसत यातङ्गैव

(मत्ती २७:३२-४४; लूका २३:२६-४३; यूहन्ना १९:१७-२७)

21 यालाँज्ञयाक तोबो नाखारनी हुज्ञयाव कुरेनीलाव सिमोनलाई येसुए ओलाँज्ञयाव क्रुस सुघुर्केर। नो मिँ अलेक्जेनूदर सोनो रूफसनी निबाबु ओल्यो। 22 येसुलाई गलगथा यादोज्ञयावक सकेसूकेर। नो पोए उमिन ‘खपपर्या पो’ है ब यादोज्ञयाव। 23 नक येसुलाई वासः झाःसिउ दाखमद्य यासवैक ते येसुए ओव माभैःके। 24 हाःत ज़ येसुलाई क्रुसत तङ्गैकेर। यातङ्गैवत ओक्वारात गोला झाःद भाःकेर।

25 क्रुसत यातज्ञैव बेलाक नौ बजिद उलिज्याव। 26 ओललाई तज्ञैद यानैज्याव क्रुसए ओडैत, “आव यहूदीराए याराजा ज्ञ” है लिद तोबो फल्यात ओखत सर्द चकेर। 27 नो छचाम नेब्लो चोरनिलाई मनी तोबोलाई ओवोर्दा तोबोलाई ओदाबर्यादा जैद क्रुसत तज्ञैद यारानैज्याव। 28 [है जैद धर्मसास्त्रलाव सर्सिउ पाँ ब नत ज्ञ योके। नलाव सर्सिउ आव ज्ञ, “नो अपराधीरास गनिसिरिज्या।”] 29 आनी हुनी भाल्सिना हुवराए याडैर डत डत जैद थल्द, “हाइ! हाइ! नँ ‘ध्यान झिमलाई तै:द सोंलात डाजैरिज्या’ है लिज्याव मिँ, 30 नँ क्रुसतिन झरिद हुद नक्याँलाई बाँचैके,” है दोकेर। 31 हिताव ज्ञ मुख्या पुजारीर सोनो सास्त्रीराए या याल येसुलाई गिल्लैद, “आवए छुतरालाई ताकितर याबाँचैज्याव, ओल ओक्याँलाई कै जैद ओमाबाँचैधुज्याव? 32 इस्राएलीराए याराजा ख्रीस जैसिज्याव नो क्रुसतिन झरिद उहुकदा, गे नो रँ:द ओपाँ पतिन्या गेले,” है लिकेर। ओलस तज्ञैसिउ चोरनी मनी हैज्ञ लिकिनी।

येसु उसिउ

(मत्ती २७:४५-५६; लूका २३:४४-४९; यूहन्ना १९:२८-३०)

33 नकिन बाह बजेकिन तीन बजे पै देस भरी काल्या कले इयाके। 34 तीन बजेवाक येसु बनै चोइस, “इलोई, इलोई, लामा सबखथनी?” है लिद किके। नोए ओसै, “अ डापरमेस्वर, अ डापरमेस्वर, डालाई काराव नरासनाव?” 35 नक च्याँ:सिद लिज्यावराए नो पाँ थैद ख्वाराए, “थैचिसाँ, आवए ते एलियालाई ची उखुल्ज्याव सा,” है लिद, 36 तोबोए धों:नाद भाताए उतुपात थाकना पो:द सिरो दाखमद्यल छिम्द येसुए ओया:त झा:द्याद पिउ परीद, “अब ते चिरुद गेनेया, एलिया कातारानी हुद माहाइज्याव?” है लिके। 37 ना:त ज्ञ येसु बनै चोइस क्रिद उस० सफ्याक्यो।

38 हो प्राईंना ज ध्यान झिमलाव बारिसिउ क्वा ब उतुपानी ओजराड पै ओलनी ज नेपरा ताद चिस्के। 39 येसुए ओडाक च्याँ:सिद लिज्याव कप्तानए निताव उस० ओफ्याःव रँ:द, “आव ते साचो ज परमेस्वरए ओजा ची ओल्यो,” है लिके। 40 हो बेलाक ख्वा मेंमाराए ब जाँ तादानी येसुलाई चिऊद यानैज्याव। नोरानी मरियम मग्दलिनी, जिम्जा याकूब सोनो योसीनी निआमा मरियम, सोनो नोनिस सलोमी ब ओल्यो। 41 येसु गालीलल उलिज्याव बेलाक नोर ओलस ओलस बारिद ओसेवा यादोज्याव। यरूसलेम पै ओलस हुव छुत मेंमार ब कुधु ज याल्यो।

येसुए ओमोरो खादर पुपल याझाःव

(मती २७:५७-६१; लूका २३:५०-५६; यूहनना १९:३८-४२)

42 नासिन्या छ्यामए ओडालाव तयारीलाव दिन ओल्यो। हो छ्याम र्याम्या रिमी ओइयानाक, 43 तोबो अरिमाथियालाव योसेफए घ्योःव युँस पिलातसए ल्योक बाद येसुए ओमोरो न्कियो। नो घ्योःव कचरीलाव घेप्पा मिँ ओल्यो। ओल मनी परमेस्वरए ओराज्यालाव येम खिमज्याव मिँ ज ओल्यो। 44 पिलातसए येसु डादा ज उसिधुव पाँ थैद अचम्ब ताद कप्तानलाई ओल्योक खुल्द, “येसु साचो उसिधुव रो?” है लिद सुधिक्यो। 45 है जैद नोए ओल्योनी येसु सिके लिन्या ओथैवत ओमोरो योसेफलाई लाँव एक्यो। 46 योसेफए फरी पालो क्वा लँ:द येसुए ओमोरोलाई क्रुसतिन हाइद, नो क्वाए लुम्बैद दावन खुपिद पुप जैद ओनैज्याव खादरल झाःद ओयामक घ्योःव लुँए कक्यो। 47 मरियम मग्दलिनी सोनो योसीए ओआमा मरियमनी नो ओझाःज्याव पो चिऊद निनैज्याव।

16

येसु सिउनी सैसिद ओसोव

(मत्ती २८:१-८; लूका २४:१-१२; यूहन्ना २०:१-१०)

१नासिन्या छचाम ओखेमोत मरियम मगदलिनी, याकूबए ओआमा मरियम, नोनी निनै सलोमीरास येसुए ओमोरोलाई थीद्यान्याए जूनी चाव सी डरो मासर अतरर लँ:द, २ सातालाव उसंकताव छचाम घग ज़ घाम पलेक नोर खादर पोदा याबाज़्याक, ३ नोराए, “गोलाई नो कसिउ लुँ सुए पलतैद्यासिउके?” है लिद, ४ खादरदा याभाल्सिक ते नो बनै घ्यो:व लुँ पलतैसिउ उलिज़्याव रँ:केर। ५ नोर फरी खादर पुपल पसिद नल उजील तोबो पालो क्वा क्वाइसिउ धापाज़ाकाव मिँ खादरए ओवोर तंदा चुसिद उलिज़्याव रँ:द बनै ज़ अचम्ब ताद यालिज़्याक ते, ६ नोए, “अचम्ब ताताच्यो, नो जेखिमज़्याव क्रुसत यासै:व नासरतलाव येसु आल माले, सैसिद सोधुके। अछादी आव यानैव पो चिऊचिकेदा, ७ जे पत्रुस सोनो उपुर्काव उसिसराए ल्योदा बाद, ‘येसु जेड़ादा ज़ गालीलदा बाज़्या दी। ओल है उलिज़्याव मिताव, होड ज़ ओलस दैसिन्या जेले,’ है यारादोनाचिके,” है ओरादोव प्राइँना, ८ नोर ननी धों:द याछ्याचेए बनै भुम भुम गूद सुलाई ज़ नो पाँ है मारादोधुकेर।

येसु ओसरै:सिउ

(मत्ती २८:९-२०; लूका २४:१३-४९; यूहन्ना २०:११-२३; ओसाचीर १:६-८)

९सातालाव उसंकताव छचाम छकालन्त्या घग ज़ येसु सिउनी सैसिद ओसोवत प्राइँरानी ड़ादा मरियम मगदलिनीए ओल्योक सरै:सिके। नो मेंमाए ओक्यौँतिन येसुए ड़ादा सात गोता माचाव पुरूसर पले:द ओरानैज़्याव। १० है जैद नोए उसिसराए ल्योक बाद उरँ:व भरी है यादोक्यो। नो बेलाक नोर यायुँ बनै माचाव दाद घरो ज़ यालिज़्याव। ११ खाली नोराए, ‘येसु सैसिके, डा ज़ रँ:द डानै,’ है

ओल्यो पाँ याथैजूयावत ब मापतिकेर।

12 फरी छीनी येसुए उसिसनी नाखारदा निबाजूयाक येमत येसु छुत सुरूप जैसिद निडाक सरैःसिके। 13 नोनी ओल्द बाद उपुर्कावरालाई है निरादोक ते, नोनी निपाँ ब मापतिकेर।

14 नकिन छीनी एघार जना उसिसर काँ याजूयुजूयाक येसु नोराए याडाक ब सरैःसिके। नोराए खाव यायुँए जूनी येसु सिउनी ओसैसिउत ओललाई रँःज्यावराए यापाँत यायुँ ओमाहुबोए येसुए नोरालाई यासिडार्कयो। 15 सोनो, “जे आव संसार भरिल प्राइँदा ज़ बाद चाव था प्राइँलाई ज़ यारासथैनाच्यो। 16 जोए उयुँ हुपूद परमेस्वरए उमिनत सछैसिजूया, हो बाँचिन्या ले। फरी जोए उयुँ माहुबे, होए परमेस्वरए ओसजा दैन्या ले। 17 यायुँ हुपूजूयावराए याक्याँत इताव सरैसर ब तान्या लेर — डा डामिननी माचाव पुरूसर ब पलेःन्या लेर, साःरो साःरो खामनी ब पाँन्या लेर, 18 घुलरालाई याराक्योःदी ब, तुन्यार याजूयुदी ब कैज़ तान्या मालेर। याजोरो हुवराए याक्याँत याकुइ नैद याराएक नोर गराँन्या लेर।”

येसु स्वर्गत ओबाव

(लूका २४:५०-५३; ओसाचीर १:९-११)

19 है जैद प्रभु येसुए ओपाँ भरी है ओरादोवत याडाकिन ज़ स्वर्गदा छीसिद परमेस्वरए ओवोर्दा चुसिनाके। 20 उसिसर ते ननी बाद परमेस्वरए ओपाँ प्राइँदा ज़ यारासथैनाकेर। प्रभु यास यास ज़ लिद नो यारासथैजूयाव पाँत अचम्बलाव सरैसर जैद्याद नो यापाँ थैजूयाव भरिरालाई साचो ज़ थःरैद याएक्यो। आमेन।]

सा:रो बाचा

Kham, Western Parbate: सा:रो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd